

O LE TŌFĀ

TATALA

Part 1



Tusia: Faumuinā Manu Samuelu

C.R
99
AM

O LE TŌFĀ TATALA

(Lāuga, Mavaega, Tōfiga, Tala, Solo)

(Tusia: Faumuinā Manu Samuelu)

MELUA THEOLOGICAL
COLLEGE LIBRARY

ANOTUSI

(O LE TŌFĀ TATALA)

Copyright © 2009

Faumuinā Manu Samuelu

Office of the Minister of Communication & Information

Technology

Level 4 Government Building (FMFM)

E-mail: kuntri_sam@yahoo.com

Ph: 685 24031. Mobile : 0685 7269955

All rights reserved. No part of this book may be reproduced or transmitted in any form or by any means without written permission from the author.

Upu Tomua	4
Faalauiloaga	6
Folasaga	8
Vaega 1(Lauga)	10
Vaega 2 (Talatuu)	48
Vaega 3 (Mavaega).....	65
Vaega 4 (Tofiga).....	73
Vaega 5 (Tala Pupuu)	78
Vaega 6 (Solo)	90

Printed in Apia Samoa by Malua Printing.

UPU TOMUA.

Ua tutupu matagi i liu ua fa'aosofia ai moegāluaga o le loto me'eme'e ona o le taliuta a le Atua o le fia, ao alo le mafua alii. Ta te fa'aete'ete foi e la'asia le vaisā fa'aoso mana'o o le Tui Feai nei o'u fano, pe sii ma tuu pei o le toga a le Aiga Taulagi. Ae o le a ou fa'ase'e i si o'u fale ve'a ma se'e lo'u vaa i papa nei tatai i le peau laga..

O o le muāau a le Atua i lo'u taumafai i fana'e lupe o le la'i le tau sailiga o se tōfa. O lea foi ua ia muliau ina ua māgoto le inafo ma ua piioa ai sa o tautai se'i aleaga, ina ua ifo le tauaumea ma loimata o le fa'afetai.

O le a taoto pea ia faa-peau o le tai tafola paia faa-lupe o Samoa aua e le nafa fa'amatahaofaiva ina i se fa'amatalaga aua o le I'a e ivi'i ina nei sala mulifasa. O le a ou le toe pīopaoina foi faa-tupe ua muli i faiva o le tauafoga i se upu a le auauna aua ua na o se fuatama.

Ao se faamoemoe sa taumate i le ete pe tua ma ni a. Pe au o manu, au o manu, au o mala. Ae faafetai i te Atua ua le afe se atua o le ala ma ua le laga peau vale o le vasa, ma ua vaelupe maua a ua le vaelupe sa a.

Ou te momoli atu lau faafetai tele i tapaau ma tulatoa o afioaga sa fai ma siliaga o le āsamoga. E faaleo foi le agaga faafetai tele i le Afioaga, i le na au i ao ia Seiuli Vaifou Temese o le Universite Aoao o Samoa i le Mataupu tau Samoa, mo le fesoasoani i le toma'aga ma le tau autaluma o le toaga. Faafetai foi i le tofa Tupaiilei Tamari Multitalo Ropi Seumanutafa mo le tulalalo ma le toe uluhulina o tūtūlu o le faleoo. O la outou fa'

atufugaga ma le auafā mau lea ua tatala, na mafua ai ona tatou umufono talatala ma tatou aleaga i le atuāmantu ae le o le fā'amuli o atu i le faasaina mai o lo outou faiva i le vaogagana ua lalaoa ai le liu o lo'u vaa, ma maua ai se gapiā o le fiāga.

O le a se lape ma ni le atoatoa o le faasoa, pe ua sala mulifasa, a'o se gagana foi ua anu i lagi i le maotaga, Tofa malie, e valavalala a tumanu, ma laulafiuā faa-tama seu gogo le auauna vaivai. Ae moe ia le efu ae to'a peā le tai. Ao le fāatutumutumuga o le agaga ia fai mamalu faiva ma taga o le tai ma le mata'alia ina nei tautaulia ona valetu'ulima lea o lo ta iganato ma lo ta tofi mai le Atua.

Soifua

Faumuinā Semau Multitalo Manu Samuelu

TUSI TALA

Mobile phone: 685-7269955

Email: kuntri.sam@yahoo.com or fms@lesamoanet

Facebook: Manua Samuelu

FAALAUULOAGA.

O se tuu mumusu ma se vaiwaiga o lagona o lo'u tagata ou te manatu ai e faapea; E tafa tasi i le Atua le soifua o le tagata Samoa. Tafa lua i lona Aiga ae Tafatolu i lana aganuu. O le tafa tasi lea i le Atua, o le Mata'isau ma le Pule aoao o le foafoaga e lagona ai le loto faafetai ona o lona tapasaina o le vaa o le auaua vaivai ma le faatauvaa ao lukaluka le folauga. Ua mapu'e ai galu fati sisina o lona alofa tunoa, ua māti'e ai viiga o le faafetai. E faappena se lagona ma se faaosofiaga na mafua ai ona fagota i aau mamao, ma savalia le tuasivi se'i aoao ni manogi e su'i ai ula ma tapena se tāuga e tautau mo le tupulaga o loo mulimuli mai.

Pe ana le seanoa le faasoa mai o nisi o tamalii ma failauga o le Atunuu aemaise lava i lo'u Itumalo e le a'e i fanua le fua ma le manuia, faatasi ai ma le pūpū fulu sa teumauina e si o'u tama ua lagomau mai tiasa o NIULEVAEA Sopepa Manu Samuelu, sa ia sasaa mai ja te au, ma ou manatunatu pea i ai poo afea se aso e totogo mai ai.

O le vайaso muamua o Ianuari 2017 na ou tu'uifaatasia ai loa nai a'u motugaafā o solo ma tala, faapea foi ma lauga sa mafai ona ou lauga ai i nisi o faamoemoe e pei o maliu, malaga, faaulufalega ma fā'aipoipoga. Sa ou manatu atonu e aoga lo'u vaivai e maua ai se faamanuiaga mo se isi foi tagata o loo ia manaomia se fesoasoani. Sa ou manatu o se meaalofa sili lea mo a'u i le atoaga o lo'u 55 tausaga, o le tuufaatasia o lenei tusi. Ona ou faigoaina lea o le tusi o le

ona fa'asoa atu ai lenei tamaoaiga o oa o le gagana mo le tele o tupulaga fou o Samoa ua se'ei i suafa matai o aiga, ina ia faaoaina ai i latou.

O le a avea foi lenei tusi o se mea faigaluega aoga mo fanau aoga, atomu lava e i ai se aoga o nai vaiwaiga mo lo latou taumafai faa-le-aoaoga. Ua ou le manatu ai e taofiofi mamau le tōfā, pe tiu fa'amatalāoa, ae o le a tatala ia le tau'i ma fa'asoa le ato ponapona mo Samoa.

E tau sua matamuli foi se faamatalaga ae o lenei galuega tele, e le faigofie loma amataga, e savalia le ala i afioaga mo le toma'aga. Faamaumau ma tuufaatasi i tauasaga e tele i nai taimi avanoa pe a malōlō mai le galuega. E tuai ona moe ae ala po i le segisegi o le taeao e lalaga ma mamanu le tuive'eve'e o le manaia ina nei motu ma salalau tasi i le ala.

I lo'u ava tele ou te tuuina atu ai lenei Tusi ma le agaga fā'aaloalo mo le faogaina e le atunuu lautele latou te fia manaomia se fesoasoani ma ia fesoasoani mai le Atua i lo'u vaivai.

Faafetai.

O la outou auaua

Faumuina Semau Multitalo Manu Samuelu

FOLASAGA

E mamae le tava' e i ona fulu, e faapea foi ona
fa'amemelo le Samoa i lana aganuu. O le ta'u o fatufatuga
o manatu ma lagona o le tusi tala, e fa'aalia ai le oa sa natia
o le gagana. Aua e pala le ma'a ae leai se muta'aga o tala o
gafa ma tala tu'u fā'asolo a Samoa. O le fafati mai faa-tai
fana'e o suiga fou o le olaga o nei ona po, ua se'e ai faa-
i'avai le mamalu o tu ma aga a Samoa, ae ua taffea foi i le
auau le nanea o a tatou agatausili ma lo tatou faasinomaga.
O lea foi ua saofai i fale le matega. O le fau e so'oso'o mai
le isi auga tupulaga e fa'asolo atu i le isi foi tupulaga. O le
ala lea e tattau ai ona toe ulu'ulu matāfolau ma toe lalaga le
punaoa o le gagana mo le manua o tupulaga. O le aganuu o
le fā'asinomaga lea o le tagata e manino lelei ai ma
malamalama i lona fā'avae papa.

Ua lagomau mai tiasā ma tao'oto mai i malae le toatele
o le au fai tōfā ma siliaga o le aganuu. O e sa i ai le oa ma
le tamaoaiga o le gagana peitai ua latou le sasa'a maia la
latou utu ona o le tofa taoifofimamau. O lea ua tamaoaiga
ai le tu'ugamau i le poto ma le oa o le aganuu ua maumau
ua lē faaogaina, a ua valetu'ulima ai favā o le tupulaga o le
talutalu fou. Ona ou manatu lea o le a tatala ia le Tofa.

Ia avea ai lenei tusi o se mea faigaluega aoga mo fūaga
lalovaoa o Samoa, aemaise foi o le sao i matau o e ua avea
ma matai, ina ia maua so latou gapia e tapena ai lo latou ofi
atu i totonu o le saofaiga a matai ma faiganuu, mo le agai
pea i luma o le soifiaga.

Ia fa'agaganaina e le Atua Fetatalai ma ia fā'aosoftmax
moegaluaga ina ia oa le gagana ma loloto le tofā ma le
fā'autaga a Samoa o le a fa'aogaina lenei Tusi mo lana
fā'atufugaga.

O le **TŌFĀ TATALA**, o le agaga alofa moni mo le
fiaga ina ia maua so latou sulufaga i a latou sailiga ma
tapenaga i soo se vailiu o le olaga. Ia aao Mai ai manogi o
le holo, e uu tapatapa ai le faleupolu ina ia nanamu ma
puaina i ala lana faautautaga. O le manatu maualuga o le
Tusi tala: Ia tatou faasoa i le tuaoe ma lufilufi lo tatou
faiva ina ia faasopolia le taliuta ma le tauauulu a le atunuu.

Vaega 1.

FOLASAGA O LAUGA

LAUGA O LE USU: (Safa'atoa Lefaga ma Satapuala)

O lea ua mapu i le to'a le sōaiga nai le lualoto o le Tuamasaga, Faleono o Leatigaga ma le Itu tolu o Sagaga, o Faleata foi ma le Gafa. O lea foi ua mapu i le sasaga le utuga vai nai Mulinuū ma Nu'uausala aua le Tuia'ana, i la outou Pule āva, aua se ata iti ma se ava le tuā, se ava le a'ua'u na afio mai ai le afioga i le pāpā na taui, le afioga ia Tualatamalelagi, affio mai ai le paia i le Aiga Satuala. Le Uso ma le Ailaoa, ao se tugase na umia mai e le mammalu ia Tuisavailuu. O lea la ua tala pāusi le mulivai o alii i le fetalaiga i lenei taeao na liugalua i lau fa'asoa le a'ua'u. Lau Afioga i le Sa'oalii, ma le paia o le Aiga Sa Tuala. Lau fetalaiga i le laau na fausia Vaili, le mamalu o le Faleaana ma le Lauti na laulelei. Se talofa i lou afio mai ma lou maliu mai. Ua alofa atu i lau fa'asoa le a'ua'u. Ua naumati tuamaota o le Afioaga o tama ia, ua laulau toafā le nu'u nei ua le maua ai se ava e agatonu ai lou afio mai. Talofa ua na o se ava fa'atofalai lele ua to, sei tau punita'i ai lo ta masiasi. Talofa ua le suasua vai papa ma ua limulimua o'u tualaoa. Ua lumafale i le moana ae tuafale i le papa. E matou te faamalūlū atu ai, ua naumati Vailoā. Ae ui lava i lea, Je paia o lena talaga, ua matou le aumai lava ni masei, ae tu'u ni telei e patipatia ai lo tatou taeao fesilasilafai auia lou afio mai.

Ae e'e maia i ou epaga o fa'afogafoga'aga, ae sei taumafai attu se matou fa'amatalaga aua so outou matupalapala. O lea ua māgoto le inafō ma ua maea foi ona pii oa sa o tautai o le namo i lenei taeao, sei tau saili se gafa fa'afitiga o alega ma le fā'autaga ia Tuisavailuu, o Muaiava o le a fai ma ositalaula.

Ua lomaloma ai nei la le tai sua ua fotu pule le tai o Tumua, ae tuāau ma fiamalu le tai o le Tuiatua. Aua o lea ua sau le va'a na tiu tau mai le va'a na tau, ao loo mau pea lago o le va'a na faō i afolau.

O le viiga la ma le faafetai i lo tatou tapa'au sili i le lagī, ona o lana tausiga fa'amalumalu i lo outou sofia ma so matou ola, ua mafai ai ona tatou aleaga ma umufono talatala i le maota i Vai'a'ua'u ma Faletasi i lenei taeao, ao malae foi e tauis i Vaili ma le Faleaana. Ua tatou tītītātā, tonini, tonana ma ua tatou fēsufia'i i le agalelei o le Atua. Aua o le mea moni o lo outou sofia ma lo matou ola e pule"esea, ua na o se fōe e fa'ae' e i le tau ma se ma'a togi fa'atō i le moana, i le finagalo tutasi o le Atua. Ae a le asō? A! se ua tūmati'e le alofa o le Atua, o lenei ua tatou fesaga'i i magāfetau soifua e pei o le fetalaiga ia Leutogitupaitaa. Ua tatou se'e ai nei i maa o malie, ae siva i lagitau. Ona tatou tau fai faapea ifo lea fāatasī ma le fai Salamo. Ana le seanoa leova na ia te'i tatou po ua tatou fāno lava. Le Viiga lena o le Atua,

Ae o le taceao lenei, e le o se aso na fa'afluaveta o le ua

lava na afua mai Manua. E taeao lasi Samoa. O le taeao nai Sauā, ma le taeao na i Samana, o le taeao na tōtō ai le tavae toto ae taavavale ulupoo. O taeao ia o le po valea ma le toto masa'a o le atumu. Ae ina ua ufitia mauga o Samoa i ave malolosi o le Tala Lelei, ona i ai lea o le Taeao nai Matanuu feagai ma le Ata. Faleu ma Utuagiagi, Malaeola ma Gafoga. Taeao ia o le Tala Lelei ua manuia ai Samoa, lea ua tatou sapi ai nei ma ula i faamanuiga a le Atua. O le aso aso ma lona faamoemoe e pei ona tatou fesilafai, Tautai mai le Atua e uli ma sao ai lo tatou faamoemoe, maua le tōfā tatala ma le fāutaga saili, aua se ai o lenei aso.

Sau ia se taimi fa'a-maea le galuega a le Tausala ma le Aumaga, ona tapa ipu lea o lo tatou taceao fesilasila'i. Tautē se ipu aua lau Afio i le Sa'oalii, lau afio To'alepai. Tautē se ipu aua le paia ia Sa Tuala, Taumafa se ava ma le Laau na fausia ia Vaili, asu foi se ava ma le mamalu o le Falea'ana. Liliu mai ala o le lupe i lenei talaga. Tautē se ipu aua le Afio i Tuula Tamalelagi, le afio i le pāpā na tausi. Tautē foi se ipu aua le Uso ma le Aijoao, Taumafa se ava ma le mamalu ia Tuisavaiuu, se suā'alo fi o le a totoe sa'a fua lea mo le tautalaga a Muaiava. Ae tatou alo ia i lo tatou agatonus aua ua mai vai a ua suamalie ava i le alofa o le Atua.

Soifua ma ia manuia lo tatou taeao.

LAUGA TALI (FASITO'O-TAIMA AFEGA)

O lea ua faaifo le na'aloa i lona taomaga mutia, Ua faaifo foi le Tuamafa fili malae. Ua motu foi i le vasa le suigā ula nai le papa, ma ua tafe magalo ai nei le ava nai Taga i le fetalaiga ia te oe se ua tuua i le Falefitu. O le a ou le toe vivitama'i la i le atumani pe ou te toe tu'umasoa, aua e faigata paia ma mamalu o le taceao ma le aso. Ma e leai foi sē toe aleale aua o lea ua nofia tiaseu e alii seu. Le afio i le paia o le Aiga Taulagi i malaen na luna. Afio Toleafoa ma Vaafusuaga ma le Falefia o ou alo. Afio Afamasaga o le Matua o Usoalii ma au Tamapa'a, o oe o le tama fāialaga na e matematea malo. O le laau na fausia i Aana. Afio foi lau afio i le Faumuina e ana le

Tupufia. Tainane le Afio i lau Afio i le Maupū o le Tuia'ana, lau afio Tuigamala o le ua fā'alanumaaveave i Aana. Ae tainane oe le alii o aiga i lo ouluia usoga Tutuila ma Ape ma le mamalu i le Falefitu ma lou fale a fasitoo.

Ae tau ia ina ia mātū le vaivavea ma le lauti le putea e pei o le fetalaiaga i le vaifanua o le Tuiatua Vimoto. Tau foi ina ou ufitia ulutau aua le maota tulutulu i tao lea ua so'o ona taiao, e pei o le upu i le fale o Po ma Ao. O lau fetalaiaga ua paū i le malu nei, se ua logo i tino matagi lelei, ua faailo foi e le Mauga o Alii tala o le aai e pei o upu e fai i Leone, ma ua Talaleomalie le asō e pei o le alo o le

Tuiatua. Ua maea ona e āfea ūta mamao ma ūta lalata, ua e sua foi le aulapa tai, sua foi le aulapa uta. O vaipapa na matūtū se ua toe suasua i lau fāutaga. Aua foi o lea ua maea ona e paininiu fetalaiaga o le taceao ma le aso. Ua maea

foi ona e tosi fā'atiti paia ma mamalu o le maota nei.Ua le gata i lena talaga i le affio a le Aiga Taulagi ma le Maupū o le Tui'aana, ao lenei foi itu o le malu i le affio atu a le Aiga Sa Gauifaleai ma ana tama o Savea ma Ututaaloga. Le affio o le matua o Manuafita, ae le gata i lea o le Sūsū i Tu'itu'i o le Natoaittele ia Fata ma Maulolo, faapea le vagana i Tulafale ma le susuga a Tuisamau. Ae le mafai ona matou foi fa'atama a le po, ae matou te lei faamanusinaina la outou fa'aaloalo lea ua opea i luma'avasi'i o Aiga ma Tuisamau. O le fā'aaloalo ua mauluga, aua foi o ava ia o ava e le so'ona tatalā, o ava e usu i le la ae tōfā i maota ma laoa. O ava e aneanea i tofaga fa'atoa tatala pe a alofisā tupu.O ava sa tu fa'atianiutu i Fogalefatu lea ua suatia ona a'a i le asō, ona o lau fa'atupu ma lau fa'aaloalo. O lau usu fa'aaloalo ma le avasi'i lea ua mata tamalii ai ma mamalu tau'e lenei taeao. Faafetai tele le mau ava.

Faafetai i le alofa o le Atua ua mafai ai ona tatou feiloi i le lagi matafi ae le o tulouna le lagi.Ua tatou feofo'ofofai i Vaelupe maua ae le o Vaelupe sa ā. Vīia le Alīi aua ua le fiti se maa o le ala, ae ua ia taofiofi iu maea i le Faigamalaga ua mafia ai ona leai se peau e laga. Ua tau fai mapu'e ai nei galu fati sisina ma ua tau fai puca ai le ofeloa ma le matila i le soifua manuia i le paia i Aiga. Aua o le mea moni tatou te le taumasina ma le finagalo o le Atua, aua o lo tatou ola ua na o se fuga e magumagu ma se puao e leleia atu i le matagi. Ave laia le Viiga i le Atua.

O taeao o Samoa o loo tausia e Faleupolu o Tofiga ma le au fue loloa.Ou te manatu o le a taoto, aua o lena ua

maea ona e afea i lenei taeao. Ae tasi lava le taeao ou te fī tautala i ai, o le taeao sili lea. O le taeao lea na pepese ai agelu i le lagi ma vivi o le a fanau mai Jesu lo tatou Fa'aolalaga. Le taeao lea na sunu'i lona alafale i Peteleema ae na fā'aattatoaina i tuāpa o Ierusalem. Le Taao lea na faia e le Atua mo i tatou e i ai lenei taeao ua tatou tāpisa ai nei i Maota ma Falealii ae a Autalaga, o maota e tausi e oe le Falefitu.

Sau se itūla tapa ipu lo tatou taeao pe a maea le galuega a le tausala ma Toleafoa ma le aumaga.Ona taute lea o se ipu aua le paia o le Aiga Taulagi i malae na hua. Taute foi se ipu i le afioga i le Maupū o le Tuiiana. Taumafa se ava i le mamalu o le Falefitu.Liliu mai le vai o Sina i lenei itu o le malu.Taute se ipu i le paia o le Aiga Sa Gauigaleai ma le nofo a tapaau.Taumafa se ava i Tu'itu'i o le Gatoaittele.Taumafa foi se ava ma le Susuga a Tuisamau, ae a sua pea le alofi ia sa'a fua se ava mo le tautalaga.

Ae tatou alo ava ia aua ua mai vai ae suamalie ava i le alofa o le Atua.

Soifua.

LAUGA ILE FELOAIGA A LE MALAGA A LE
AUTALAVOU MO KERISO MAI APIA MA LE
MALO AMERIKA SAMOA, SA FAATINOINA MA LE
LE AFIOAGA O VATIA.

Ae ou te le'i utufia Vailoa ma Vaigaga na asa ai Tuisalalovasa, auā le aso o Tafaigata nai Faleata. Ae ou te le'i sopoia foi le Togāniusā o le Tuimanuamama, e muamua ona ou taia le Tafitoa e pei o le ava nai Utumalama nai Amoa. Ou te muai tōtō foi le taamu teevale ma taoto faa-manu gase aua paia o le taeao ma le aso. Ou te fā'atulou atu ai i paia ma mamalu o le Faigamalo a Amerika Samoa. Tulou le Afio i lau Afioga i le Kovana Sili. Le afio i lau Afioga i le Lutena. Lau afioga i le Fofoga Fetatalai o le Maota Mauluga ma sui o le Senate. O le paia lava lea aua le Afio o Sua ma le Vaifanua, Fōfō ma Atulagi, Sāole ma Saleaumua ma le Launiu Saclua. Tulouna Fa'atui o le motu, To'oto'o o le Faleula, Tama ale Manu'atele ma le La'au na Amotasi i Samoa.

Ou te fa'atulou foi i paia o le afioaga o Vattia o loo ua fai ma sui o le malo i lenei taeao. Lau afioga le Senetoa, Lau Afioga Gaoteote o le Tamairai o le Ao. Afio lau Afioga Tagoilelagi, afio nofo fanau ma Usoalii. Alalatai oulu Matua, ae tainane le mamalu i le Sa'oфаїgā ma le Lautinalaulelei. Ua paia ai nei le malae o le Talu e tauis e Taessalii ma Ta'amuvagafa ae a oulu le Launiu saclua, o le malae o le fa'autunatagi a Tutuila ma Manua aua le tafatolu o lau faiga malo. O lea foi ua paia ma mamalu lenei taeao, aua o lea ua usu fa'aaloalo, Lau afioga i le

Taitai Fono ma le mamalu o le Komiti Fa'afoe a le Autalavou mo Keriso i Amerika Samoa, aemaise o Feoi o le Talalelei.

O lau ava fā'atupu ma le usu fa'aaloalo a le mamalu o le Malo Tutuila ma Manu'a e ala i le afio mai o lau afioga o le Tamaitai o le Ao. Afio foi Tagoilelagi ma le mamalu o Tapa'au e tauis e Sa'oфаїgā ma le Lautinalaulelei, ua fā'amalo fa'afetai. Aua o lea ua e suatia le ava feai, o le ava e tōtō i le vaosā o le Tuimanua, ona o lou silasila i lo ta gafa ua tau. Le Tuaana, Le Tuiatua ma le Tuimanua, Sa Malietoā ma Sa Tupuā. O Aiga o nofo ma Aiga o Pāpā ma Aiga Tafaifa. O tāua lena. Fa'afetai tele i lau fa'atupu ma lau Fa'atamallii, o ava e le so'oma tatālā, aua o ava e sa. O avā e alofisa ai Tupu, peitai ua e tatala le ta'u ona o le Atua ua mafua ai lenei mafutaga. Fa'afetai le mau ava. A alu alu la le fā'atofalaiga o lenei taeao ma fā'amaumau ona fausaga, fā'amaea foi le galuega a le Tausala ma le Aumaga, ona tapa ipu lea o le taeao mamalu. Tapa se ipu auā le Afio i le afioga i le Senetoa le afioga le Tamaitai o le Ao. Tautē se ipu aua le afioga ia Tagoilelagi. Tapa se ipu auā Nofo fanau ma Usoalii. Taumafa se ava aua oulu matua. Taumafa foi se ava aua le Sa'oфаїgā ma le Lautinalaulelei. Tautē se ipu a le Afioga i le Taitaifono o Amerika Samoa. Taumafa foi se ava i le Susuga i le Fa'atomu. Liliu ane ala o le lupe i lenei itu o le malu. Tautē se ipu aua le Afioga i le Taitaifono ma le mamalu o le Komiti Fa'afoe mai Tumuā. Tautē foi se ipu aua le paia o Feoi o le Talalelei ua tattou fa'atasi i lenei taeao. A alu alu

la le fa'asoa a le aumaga, ae i ai se suālofi o totoe, ia ona sasa'a fua lea mo Leulumoega.

Tatou ave laia le viiga i le Atua, aua o lea ua tutu i nuu manaiā lo tatou sa i lenei taeao. O lea ua fesagai segaula ma ua fa'atauata foi le la ma le masina. Aua e ui lava i so tatou faamoemoe sa lupe e i ai le asō, peittai, ua na o se foe lava e fa'ae'e i le tau. E failā foi tu i le ama pe a aunoa ma le fesoasoani mai o le Atua. Ae faafetai o lea ua mapu'e galu fatisisina o le soifua o le paia o aiga ma tapa'au. Ma ua tau fai pue'a foi siugafa o pesega o le loto fā afetai ina ua au o manū le asō, ae ua fulifaō le va'a o mala. O lea la ua atu ē le l'a a le tautai i lenei taeao i le alofa o le Atua. Ma ua tatou tepa ai nei i ula, ua tago i ula ma ua tatou futifuti manu ula i alofa ma le agalelei o le Atua. O upu foi e fai i le sēuga a le Ulumū ma Lefaoceu. Se ua se togī le seulagatila ua e fa'apulou i le tualima. Fa'amalo le Atua, Faafetai i lou alofa ua au o manu ai le asō. Goga laia le Viiga o le Atua.

Ao taeaō faitauina o Samoa, e ui lava ua laulauvivilu ai Faleupolu o Tōfiga ma le au füe loloa o le atunu, e pei foi ona fetalai i ai Lauti i lenei taeao, peitai e leai se faleupolu e faatauagavale i ai. O le taeaō nai Sauā ma le taeao nai Samanā ma le aso nai Namō o taeaō ia o le po valea o Samoa, o taeaō na utu ai le toto masaa. O taeaō na tōtō ai le tavae toto, ae taavavale ulupoo. Ao taeaō sili, o le taeaō na sulugia ai laufanua o Samoa i ave malolosi o le malamalamā o le Tala Lelei, e i ai Mataniu Feagai ma le ata, Faleu ma Utuagiagi, Malaeola ma Grafoaga. O taeaō ia ua faitauina o taeaō sili ia mo Samoa. Lea foi ua tatou umufono talatala ma tatou aleaga i Magafetauola i le Malae

o le Talu nei, i le alofa o le Atua i lenei taeao. O a fuafuaga ma faamoemoega o le tuutuu laau mai o le au malaga mai Tumuā, aemaise foi o le alofaiva o le mamalu o le malo i tiute ma faiva, ia malu aaoina e aao alofa o le Atua.

Ae tatou alo ava ia aua ua mai vai ae suamalie ava i le alofa o le Atua.

SOIFUA

Tatou alo ava ia aua ua mai vai ae suamalie ava i le alofa o le Atua. Ae faafetai o lea ua mapu'e galu fatisisina o le soifua o le paia o aiga ma tapa'au. Ma ua tau fai pue'a foi siugafa o pesega o le loto fā afetai ina ua au o manū le asō, ae ua fulifaō le va'a o mala. O lea la ua atu ē le l'a a le tautai i lenei taeao i le alofa o le Atua. Ma ua tatou tepa ai nei i ula, ua tago i ula ma ua tatou futifuti manu ula i alofa ma le agalelei o le Atua. O upu foi e fai i le sēuga a le Ulumū ma Lefaoceu. Se ua se togī le seulagatila ua e fa'apulou i le tualima. Fa'amalo le Atua, Faafetai i lou alofa ua au o manu ai le asō. Goga laia le Viiga o le Atua.

Ao taeaō faitauina o Samoa, e ui lava ua laulauvivilu ai Faleupolu o Tōfiga ma le au füe loloa o le atunu, e pei foi ona fetalai i ai Lauti i lenei taeao, peitai e leai se faleupolu e faatauagavale i ai. O le taeaō nai Sauā ma le taeao nai Samanā ma le aso nai Namō o taeaō ia o le po valea o Samoa, o taeaō na utu ai le toto masaa. O taeaō na tōtō ai le tavae toto, ae taavavale ulupoo. Ao taeaō sili, o le taeaō na sulugia ai laufanua o Samoa i ave malolosi o le malamalamā o le Tala Lelei, e i ai Mataniu Feagai ma le ata, Faleu ma Utuagiagi, Malaeola ma Grafoaga. O taeaō ia ua faitauina o taeaō sili ia mo Samoa. Lea foi ua tatou umufono talatala ma tatou aleaga i Magafetauola i le Malae

LAUGA O LE SHI O LE PAOLO TU. (Malii o le tausii alii ia Taulapapa Iosia o Lalovi Mulifanua 2015)

A fa'atau sili mea le siaga a tautai alii, ona utu sanisani lea o le lupe lele malie, ae fa'aifo i malae o le toto'a. A fa'ataupuea foi siugafa o pesega e pale feagai ma le attu tiāologo. E masuiga lava ina ua tōtō le mutiasā i le vai o Galoa, ae lolo i fisaga o savili agi malū. Ona fa'aatu ē lea o le Taufalemā ina ua filimafua le filiga, ae tapalemālāma le mātaigātila. O le a ou le toe faaiteau pe ou te fa'atapa'i sau aua ua galu le tua'aumafuamalu. E ui foi ua fa'amanu po'ia i ofaga le paia o le Afioaga i le afe mai o le ofi. Ae ona o lo tatou olaga tatou te soifua i le lupe tu pola. Tulou,

Ae ou te lei utufia la Mataiva aua le Tuiiana, ae ou te lei asaina foi le Vaisā fa'aoso mana'o o le Tui Feai nai Malaeloa, ou te savali fa'aeteete nei fano. O le ala lea ou te fā'atulou atu ai i paia o le lagi ma le lagi, Tulou. Ua lagia le maota i Alaiava e afio ai Taulapapa o le alo o Malietoa. O le lagia lava lea o le afioaga o Alo o Malietoa ma Usoalii. Susu le Faakei ia Falute. Susu le Lautinalaulele ma le fetalaiaga Attimalautolo.

Talofa i le nofoa vaevae loloa o le Malietoa o lele ua masofa. Talofa i lona fala na folo loa o lea ua ta'ai ma sili i le talitali. Talofa i iona talaga atoa, o lele ua tasisi ona pola. Talofa i le Lautaamu tafea a le Aiga Sa Malietoā lea ua magoto i le moana e le toe maua mai.

O se finagalo ea o le paia o Aiga? Ao se tōfā ea i le paia o le Afioaga? E leai, aua e ui lava i se tofa loloto sa fuafua

ae o le tofa e fa'ae'e i le tau, e ausaga le tuvae, ma le finagalo paia o le Atua.

Le paia e, o so'u paolo ou te malu ai i itu e fia o Samoa. O lea ua affifo mai le paia o le Aiga Taulagi, ua afio mai Tuigamala o le Maupū o le Tuia'ana, ua omai le Falefitu sei tatou tauso fa'atasi le avega ua mamafa tu. O le tu'ua o le malo e le afioga i le Faletua o le Alo o le Malietoa le sa tausi alii i le afioga ia Taulapapa. O le tu'ua lava lea o le malo i le afioga ia Punipua o feoi o le Tuia'ana. O Malietoa Taulapapa o suli lava ma feoi o le Tuiaana Tamaalelagi.

Na usu Selaginatō ia Vaetofaga le afafine o Sanalala i Safata faaee le gafa o Tuiiana. Tamalelagi. UsuTuiiana Tamalelagi i le afafine o Laulunofovalēane faaee le gafa o Tuitogama'atoe. Usuia Tuitogamaatoe e Lemafaituuga mai le Vaimauga fa'aee le gafa o Malietoa Taulapapa. O le asō lea ua moni ai le upu o le Mawaega i le Tai, ta te fetau i iu o gafa. E ui lava la ina ua toe fesaua'i le gafa o le Tuia'ana, ae faigata o oe na usu ae ou tali. Ona fa'apea lea o se fa'amatalaga.

Alo maia lena itu o le aiga sei o matou taumafai atu sei momoli atu le valevale alofa aua le aso o le Afioaga i le Tausi Alii. O le a muamua atu le laulaau ma le fai teu a tina o lenei aiga. Molimoli atu i le seleni e afe tala, ae ufitai i le ie o le malo. Lau fetalaiaga Fa'avaiiautele le o loo tu i matagiolo aua le faamoeome i le asō, o le Tōfā lea a lo outou aiga. O le Sūmatu'u, o le toga a le Aiga taulagi lea ua tatala i le asō aua le aso o le afioga ia Punipua, po'o le afioga i le tausi alii ia Taulapapa. E tofu le tagata ma ona

leaga ma e leai foi se faiva e asa ma se maumau. Matou te talitonu foi i le asō, e i ai leaga o lenei tīnā i totonu o le aiga, ae matou le leiloa mai foi pe sa faapefesa ona fai lana tausiga i le afioga i le Taulapapa. Ona fa' apea lea o la matou tala, O le toga lea e fa'amagalo ai ni leaga o le afioga ia Punipuao, alu atu ia i lenei aso ua tatou fā'amavae atu i ai ma galo atu ai ni ona fa'aletonu. Fa'avaiautele, sa i ai lava le manatu i lenei aiga e avatu le afioga ia Punipuao e lagomau i lo matou aiga, peitai ua matou talitonu ua e alofagia le tagata ese sa mau ma oe. Faafetai le alofa ma le agalelei i lo matou tuafafine. O le ie lea e ufi ai le eleele sa o le Aiga sa Malietaoa.

Ona fa'amuluai lea o sa matou fa'amatalaga. O le toga lea o le moemoe o le malo tumua. O le toga sa leoleo ai le malae i Fogalefatu lea ua tatala i le asō, e māvae ai le afioga ia Punipuao ma le Afioga ia Taulapapa. O le seleni lea e sefulu afe tala e fesoasoani i le peaufāmavae o le tīnā, faatasi ai ma le palapala malo e selau pusa apa ma le manu mai le tuasivi.

Matou te fa'amalulu atu i lau Fetalaila Faava ma le paia o lena itu o le Aiga, se ua auau lava ma'a o le mattiva, ao le agaga moni e le uma lo matou fia fai aiga lelei. Afai ua le so'o lou titi ma ua le tau foi lou pale, fa'autaga malie. O le a foi se laufala vao ua e silasila i ai, pe ili pe patuavalu, tofa malie, o le mea moni, ua matou le aumai ni masei ae tuu ni lelei. Ae o mea ua foai mai e le Atua i lenei aso, avea ia lea ma a tatou taulaga e manogi i lana silafaga. La agalelei mai le Atua i lenei aso ia uli ma sao le fa'amoemoe o le afioga ia Punipuao. la ua nei gasolosolo

ao pe ta'ape pāpā i le paia i tapa'au aua le Aiga Sa Malietaoa. Ia maua lau lauga aua le feagai ai ma paolo ma gafa aemaise o le tausiga o le afioga o tama ia. Maloloina foi le paia i le nofo a tula i lenei itu o le aiga.

Sofua ma ia manuia.

LAUGA O LE TA'ALOLO I LE FA'AULUFALEGAA LE EKALESIA EFKS I MATAUTU FALEALILI.

O lea ua fana'e lupe le la, ua fa'alava foi le aniva, aua ua pepulafifi fetu o le lagi, ae pepese fetalia'i manu o le affafi. Ua fa'apōpō lava ni aso ua, ao aso folau ua le mafai ona tuua. Ae fa'amua ia sa matou fa'apolo ma se fa'asagi i lo tatou Tapa'au Sili i le lagi, aua ua tajia fa'autunatagi. O lea ua tao'oto peau o le sami ua tulolo foi matāmatagi, ma ua le feala īlāmutu o le vasa ma ua le afe se atua o le ala. O lea ua Taumailelei le igoa ipu a Leuluaialii, ina ua savini fa'apuniamanu tu o le tāsaoalii. Ua Fetaia'imauso le igoa ipu a Tauilili. Ma ua faatū uto nei le saena ua mua atu mua mai, aua o lea ua timi pāo le uto e pei o le faiva i vai.

Ae ou te lei asaina la le vao sā o le Tuimanu'a, e muamua ona ou fa'atulou atu i paia o le tupua ma le aai. Le affio o le paia o le Aiga Salevalasi o le aiga paia. Afio Matautia ma Tupuola ma le Galu Taulelea. Tainane oe Lufilufi ma lou tapaau o le Tuisamo. Le Susu i lau Susuga le Fa'afeagaiga Taulagi Amosa Vaetoe ma le Faletua. Susu Susuga i Aoao Fesoasoani ma o latou Faletua. Le mamalu i Poutū toa o le Ekalesia i Susuga i Tiakono ma outou faletua, faapea le paia lasilasi o le Ekalesia i Matautu nei.

Ou te manatu ua afulelea le tausaga ma ua magoto foi le inafo, ma ua pi'ioa ai nei sa o tautai sei aleaga ma atu ē, aua o lea ua tu le failā. O lou napatia ma lou milosia, o lou maosiosia ma lou fatuatia, lea ua tino mai i le asō. O lou fā'amoemoe sa fau i le ao ma le po, ao le fā'atufugaga o lagona ma manatu i le sailina o le tōfā ma le fā'autaga aua

le 'ala ma le mila lea. Se malo fai o le faiva malo le galulue.

Tulouna lau afioga i le Matuaofaiva ma le falefā o lo outou Aiga Salemalama. Tulouna lau Afioga i le Mana'itaua. Tulouna lou Apisā. Tulouna lau Afioga le Taufalemau. Tulouna le Faioa. Tulouna le Fatamanu, Tulouna lau samala ma lau ato faatufugaga. O lea ua pafuga le a e pei o le upu e fai i le gataiffale. Ma ua ta ili foafao e faailo ai le fua ua tautai a'e i fanua aua ua tali le Atua i au tatato.

Ae alo maia, sei taumafai atu le Susuga i le Toeaina ma le Faletua ma le Paia o lenei Ekalesia, aua le affio mai o le paia o le Aiga Taulagi. Le Maupū o le Tuaana ma le manalu i le Falefītu, sei molimoli atu sa matou fesoasoani' aua lou faamoemoe i le asō, e fāigata lo matou feagai ai ma le matou faafeagaiga. Le Susuga i le toeaina ia Lale Jeremia o se alo e faasino i le paia i le Aiga Salevalasi ma Lufilufi.

O le Tōfā lea a le Ekalesia. O le toga lea sa auafa i Maota ma Falealii e affio ai le Aiga Taulagi, O le Sii ma Tuw, lea ua tattala i le asō, aua lou faamoemoe. Le tōfā lea a lau Susuga le Faafeagaiga Amosa.

Lau fetaalaiga Lufilufi, lau Susuga le Fa'afeagaiga ma le paia o le Ekalesia, o le a matou le toe fāgata i le sao pe ta i utuma'au aua o lena e i ou aao le faautaga o le asō ma lona fā'amoemoe. Ae o le a e silafaga loa i se fesoasoani a le Susuga i le Toeaina ma le Faletua ma lenei Ekalesia e palalau atu i ina e fai i ai au fuaifiaga.

Lau fetaalaiga Tusa, o le ie lea e uifai ai la matou fesoasoani, o le auafā a le Susuga i le Toeaina, lea ua tatala

mo le fa'amoemoe i le asō. Ma le matou seleni lea e sefulu
afe tala.

Ua faagata mai ai sa matou faamatatalaga, tau ina i
alofagia e le Atua o manuia lau Susuga le Faafeagai ma
faletua, ia maua lo ouluia soifua maloloina e auauna ai
Alii i le afioaga o Aiga ma Lufilufi. Maua le tofa i le paia
le Aiga Salevalasima le nofo a Tappaau. La maua lau laug
Lufilufi aua le feagai ai ma le faamoemoe i le asō. Ao lo
lafo lea e faaifo ai le fetalaiga pau i lenei taeao.

Soifua ma ia Manuia.

O lea ou le seutafilia le naa, ae o le a ou seu matātoaga
aua le fuiifui lea ua tōtō ifo i le maotaga. Ua logoua aso
loulouā ma le malu afā, ua logolā foi aso lagi lelei ma le
mugalā. Ae o le a sei ou faasee i si ou fale ve'a ma see
malie i papa lou vaa aua ua mammalu le lauamamu.

O lea ua mapu i le to'a le soaiga nai le Lualoto o le

Tuamasaga, Faleono o Leatigaga. Le Itu tolu o Sagaga.
Faleata foi ma le Gafa. O lea foi ua mapu i le sasaga le

utugāvai nai Mulinuū ma Nuuausala i lau fa'autaga Seuala.
Lau tofa le totoo o le Tuuatua Fa'anofonof, lea sa e tu i

matagiolo aua le fa'amoemoe o le afioaga ia Talaleu, poo le
afioaga foi ia To'oa i lenei taeao. Se ua fa'amalo le fetalai
fa'aaloalo faafetai le malele fa'atupu. Mātu laia i Faleula,
ae utupūpū fulu o le segaula i le fetalaiga ua paū i le malae i
Fogalefatu, o tua o Ma'auga ma Nu'ausala.

Pau a o lea lau fetalaiga le to'oto'o ma le paia o lena itu
o le aiga. Talofa e, Talofa e, i lou tilitilialulu mai ona o lau
lupe sa fa'alele. O le lupe na fāia mai le fuiifui mo lau
faigataulaga i le Atua. Talofa ua le tu i lou liima, ua le tu foi
i lona tula ao lele ua ifo i le eleele. Talofa i le lautaamu tafea
a le Aiga Sa Malietoā lea ua magoto i le moana e te le toe
vaia. Ae le o se tofā i le paia o Aiga na lua. E le o se loto
foi o lenei Ekalesia, e tu malele lava le finagalo tutasi o le
Atua.

**LAUGA TALIO LE PAOLO (Tuumalo o le Faletua ia
(Tifitelei Jeremias) o le Afioaga le Taitai Fono ale FFKS
Rev Elder Lake Jeremias sa faia I Fasitoottai)**

Seuala ma le mamalu o lo outou aiga. Le Sūsū i Susuga i Fa'afeagaiga o Feoi o le Talalelei, aemaise o le nofo a tula i muliauma eseese o lena itu o le aiga. Ua mamalu ma paia lenei lauelelele ona o lo outou afifio mai.

Ia a fa'afefea, o lea ua lagia Mattautunaaai o le maota e afio ai le Tuiatua Faanofonofo. Ua õia le malae i Malaefono e tausi e Tootoo ma Saleaumua, aua o lea ua tuumalo le Afioga ia Talaleu, o le alo o le Tuiatua.

E tua Mulinu'i Falenututupu, E tua Falenututupu i le Vainiu, E tua le Vainiu i Vaie'e, E tua Vaie'e i Vaiili'i, E tua Vaiili'i Salani, E tua Salani i Falefasa ae tua Falefasa i Saoluafata. O ou mamalu tau'e na fa'a-Ātua e pale feagai ma le Tuiatua, e i ai le asō. E faigata le tupu na e tausi..

O lea foi ua fā'i a le poutu o le maota i Feagaimaleata e afio ai le Tapaaufaasina. Ua lagia foi le maota i Tuvalagi e afio ai le alo o Malietoa. Talofa o lea ua tāai lona fala na folaloa, ua malepe foi lona nofoa vaevaeloloa, ma ua tasisi pola o lona talaga atoa. Aisea? Ua tu'ua le malo e le Afioga ia To'oa. Ua lagia foi le malae i Fufiata ma Ma'auga e tausi e oe na Pule ma Safotulafai. Ua lagia le maota i Faletausalā ma Lefutu e afifio ai alo o Malietoa, ua lagia foi Taua'e ma Faioa e afifio ai Sa Alalattoa, ua lagia foi Lotofusi ma Faleua o maota e afio ai Leitua ma ona Alo. Ao se usugafono ia Safotulafai. Aua ua tuua le malo e le afioga ia Tuitogamaatoe. Ua lagia foi Lepea ma Vaitagutu aua le Afio o Tama a le Fale, ae a le Faumuina, le Tupuffa ae fa'amalumalu ai le Tauaitu ma le Saofaiga m le mamalu ia Faleata. Ua lagia foi le afioaga o le Aiga Salevasi, le aiga paia aua le Afio o Mata'utia ma Tupuola,

tausi e le to'oto'o o Lufilifi, aua ua tu'ua le malo e le Afioga ia Talaleomalie.

Tofa malie lau fetalaiga i le to'oto'o, ua faa-fualeva sa matou tala, e ui o se alo e fa'asino i lena itu o le aiga ae faigata o le matou tinā e tau tupu lona gafa, o le ala lea o le taurafai atu lava o si a matou motugaafa.

A'o lau fa'aaloalo maualuga e ala i le toga paia lea. O le Pulumaleleuleu a le Aiga Salevalasi fa'apea le Aiga Satuala. Le nafinafi ma le natunatu, aemaise o lea ua e tatala le Lauta'amu Tafea a le Aiga Sa Malietoā i le asō. Malo faafetai le ositaulaga. Ua le gata i toga ia ao le seleni paia aemaise foi o le fula ma le mamala. Faafetai tele le fā'aaloalo. O le mea moni, se ua titi manu ua lava manu, ua fata luga fata lalo i au fa'aaloalogia. O le asō foi, ua le pei o le aso o le suagaipo nai Avalua na tutu, tūtū, sāēl fua, ae o le Aso lava o le saesaegalaufa'i a Tumua na tala lafo ai Ātua. Malo le alofa.

Mulia'i lea o se fa'amatalga a lenei Ekalesia, lau fetalaiga le footoo Seuala, Palalau maia laia o la outou fā'aaloalo, sau se taimi ona tatou toe feiloi lea, to so outou matupalapala. Ae ia fa'amantuia le Atua i lau fetalaiga le To'oto'o, aua nei solo lou fue pe gausia lou to'oto'o. La tu malele lau faautaga e tausi ai tama ia, aemaise foi le tapuaiga mau ia Safotulafai na e alala mai, Lufilifi ma le Manusamo aemaise foi Faleata o lo'o agaia ma tapuaiga lou to'oto'o i lenei taeao. Soifua manua le nofo a tapaa'u o lo outou aiga, i ona itu tetele ma ona itu tauvagi. Manuia Susuga i Faafagaiga ma Faletua o lo'o fai tatalo mo le manua o aiga. Talosia pea i le Atua ia uli ma sao le

fa'amoemoe o lo tatou tina, ae matou ola i le alofa o le Atua.

LAUGA FA'AFETAI O LE FA'AIPOIPOGA AFIOGA
IA MUAGUTUTI'A MA LE AFIOGA IA
TU'UAMALEULUAIALII SA FAIA ILE TOFA
MAMAO I LEAUWA'A.

Soifua.

E muamua ona ou fa'atulou atu i paia o Samoa ua potopoto i lle malae i Malaeola ma Gafoaga i lenei aso. Le paia tele i le usoga a Pule ma Tumua Ituau ma Alataua, Aiga i le Tai ma le Vā'a o Fonoti. Le afio Sua ma le Vaifanua, Fōfō ma Aitulagi Sa'ole ma Saleaumua ma le Launiu Saelua. Tama a le Manuatele, To'oto'o o le Falecula, Fa'atui o le imotu ma le Laau na amotasi. O le paia lava lea aua Aiga ma a latou Tama o tama foi ma o latou Aiga. O Aiga o nofo ma Aiga o Pāpā ma Aiga Tafā ifa. Oute faatulou foi le Sūsū i Susuga i Faafeagai ma Faletua o Feoi o le Talalelei o loo latou fai tatalo mo le manuia o Samoa.

O lea ua moe manū nei le ata ua moe foi i Fogalefasa. Ua Talaleomalie le suafa o le alo o le Tuiatua i le asō aua ua le afe se atua o le ala, ua mafua ai ona tatou umufono talatala i le maota nei i pu'e o manū ae le o au o mala, o lea ua tepa i ula, ua tago i ula ua tatou futifuti manu ula e pei o upu i le manu ula, i le agalelei o le Atua. Viia le Alii.

Ae fai ia lo'u leo ma fofo'aga o le paia i Aiga na luga, e momoli atu ai so outou matupalapala aua le asō. Le Afio o Sa Maualaivao, Afio le matua o Fa'amauasili, Afio le Afio le Tapaa'u faasisina, i le Malietoa na faalogo i ai Samoa, Tainane le fetalaga ia Auimatagi ma lo latou Falefitu. Afifio foi le paia o le Aiga Sagauifaleai. Afifio o

oulua tama o Savea ma Ututa'alogia. Afio foi le matua o Manuaifua ma le nofo a tapa'au, ae tainane Tu'itu'i o le Gatoaitele ia Fata ma Maulolo, le Vagana i Tulafale ma le Susuga a Tuisamau.

Affio foi le paia o le Aiga Sa Tuala. Afio lau Afioaga i le Sa'oalii, lau afioga To'alepaialii, Le fetaalaiga i le laau na fausia ia Vailii, Le mamalu o le Falea'ana ma le Lauti na Laulelei. Afio foi Lauano ma le Aiga Sa Lauano, Afio Salima ma Toleafoa ma le mamalu i to'oto'o o Malaeola ma Gaoaga ma upu i le Falea'ana.

O paia ia o lenei aso, aua le tu'uifa'atasia o le afioga ia Muagutut'i'a poo le afioga ia Toleafoa ma le Afioaga ia Tu'uamaleuluaiaili poo le afioga foi ia Fuatino ua mafua ai ona tatou potopoto i le malae nei.

Lau Susuga i le fai fa'aipoipoga lau Susuga le Fa'afeagaiga Luapene Nepo, ua faamalo le laoa'i, faafetai le tima'i i le feau o le Talalelei e amataina ai le aiga o le ulugali'i fou. Fa'amanuia tele le Atua i lau Susuga le fa'afeagaiga

Taulagi ma ou tiute ua vala'auina ai e le Alii. Lau Susuga le Toeaina Fa'atomu mai le Matagalueluga a Niusauelese, lau Susuga Taipo Malifa ma le Faletua, faafetai le titi fai tama, ua ouluia fa'amalo 'ulo'u mai lava i vasa e fia ona o pelega o fanau. Fa'amalo le alofa. Le paia i le aufaigaluega totofi a le Atua ua Sūsū mai i lenei aso. la fa'amaniua tele le Atua i o outou faiva alofilima o loo fā'atunapa'ulua ai ma fā'afalelemalu ai i afioga ona o le galuega paia a le Atua. Le paia o Samoa i ona tupu ma ona e'e, i o outou itu taulag ma outou gafa tau tupu faapea foi le mamalu lasilasi o le Au Valaaulia Faafetai lo outou Affio mai ma Tala mai o

aao. Ua maualuga ma mamalu lenei aso ona o lo outou affio mai. O la matou tatalo ia fā'atutumu e le Atua mea ua outou fā'agaogaoina ma ia taui atu ta'i sautua selau lo outou tamaoaiga ona o lo outou agalelei i le Aiga fou.

Faafetai foi i le paia o Aiga na lua ona o le tapenaina o lenei fa'amoemoe taugata e le taugofie, ona o lo outou silasila ma le alofa i fanau ua tuuifaatasia e le Atua i le asō. La faamanuia mai le Atua i lenei aso, afai o le a tuuama le fua ma tatata le filialii, ia tatou mavae i le Mavaega nai Falepunaoa a le Manu Samoa ma lona Tuafafine o Pagofie, O manū ta te mavae ai, o manu foi tatou te toe feiloai ai. Manua le Aiga fou, la maua foi e le mamalu o le tatou malu nei se Kerisimasi Fiafia ma se Tausaga fou manuia.

Faafetai

LAUGA UMUSAGA O LE TATAU

O le a le toe ta i matau, pe ta faalama i se tu'umumusu ina nei sii ma tuu ona fai lea ma lape o upu. Ua logolā aso lagi lelei ma le mugalā. E logo foi le tuli i le tātā. Ae ina usosofa e Tasi le hualoto nai gatai o Saleimoa, ona tūlei lea le tai loloto i Aana ae tai papa'u le Tuamasaga sei tau saili le tamaitai o Maa. O le ala foi lea o le nofo fale o le aiga S

Tuiamaa.

Ua ou manatu ai i lenei taeao, e faapea lagona o lenei aso. O lea ua nofo fale le paia i le Falelua o lo outou Aiga aua le lagi malofie, aua ua ifo i malae o le totoga le lupe le malie i lau afioga i le Matuaofaiva o le sa e fitaituga ma napatia aua le manulauti o lenei aso, i le mananuina faati o le laei mau o tamalii. Ua matou manatu ua e fatuatia, ua noonooia, ua e maosiosia ma ua ulufia lou aao ona o le galuega tele sa feagai ai. O lea ua pafuga le a e pei o le upu i le seuga gogo ina ua magoto upu i mala, ae manu upu i ofō, e i ai ona tatou feiloi i nuu ao ae le o nuu po.

Tulouna la le paia o le maota sa. Tulouna lau afioga le Agaiotupu, Su'a ma le Falelua o lo outou aiga. Tulouna la afioga le Meanai taua, Tulouna le Taufalemau. Tulouna le Faioa. Tulouna lau Tuluma ma lau Ato au. Tulouna lau Atapulu, Tulouna lau Au sogi aso, Tulouna lau Au mono. Tulouna lau ato pupu fulu ma lau pupu lama. Tulouna le paia ma le mamalu tau e'e o le maota nei. O sa ia o le lagi malofie aua le asō ma lona faamoemoe.

O lea ua tutu i nuu manai lo outou sa, ma ua sili mea foi le seuga aua o lea ua a'e manua le ālo faiva o lau afioga e lenei aiga aua le asō. Afai ua le soo lou pale ma ua le tau

i le matuaofaiva ma le falelua o lo outou aiga. Faamalo le faatoatoa, malo le onosai aua sa outou faa-aao gagase ma lelepa faa-manu ula i tafega o le au ina ia tau lau o le faamoemoe.

O lea ua tatou tepea i ataata o le mauga o le Puao lele. Ua tatou umufono talatala i le lagi matafi ma lagona me'eme'e ina ua sooula le fala ma ua atoa moli i le futiafu i la outou galuega tele sa feagai ai.

Faamalo foi le onosai, malo le loto tele i le fetalaiga ia Sinamaitai ma le tausi ia Tauilili ma se tasi o le fānau, ua faapito augaFa i ai le asō ma lona faamoemoe, aua le mananuina o lo oulia laei ma le malofie.

Ona faapea lea o sa matou faamatatalaga. Su'a ma le falelua o lo outou aiga, ua e gase a, ua e aao gagase aua ou faiva alofi lima. Alo mai laia sei o matou taumafai atu. O lau tofa lea. Su'a, sa pisipisia ou aao ma ou fofoga i le eleele ma le palapala mai lava i le amataga o le galuega e oo mai i lona taunuuga. Malo le onosai, fafafetai le mata alia. O le toga lea o le Tali Pisi e faigata lou pisipisia ma lou satia i fale. O le toga lea o le Fusitā e toootoo ai ma fōfō faalavalava o le taāga.

Multa'i lea o sa matou faamatalaga, o le toga lea a Sa Fenunivao o le Faasoasoaga a Tumua ua tatala i le asō e auau ai le faamoemoe aua le auga o aute o lenei aso.

Faatasai ma le seleni lea e lima afe tala. O lea ua i ai ma lo outou faaoso ma la outou taumafaga e talialo ai le asō.

Matou te faamalulu atu i lau Afiosa ma le Falelua o lo outou aiga, ua na o se laufāla vao ma se patuavalu ua maua e lenei aiga aua le asō. Afai ua le soo lou pale ma ua le tau

lou titi, malu ave i fale i lo outou finagalo ma sa outou silasila le tau.

Ae ia alofa mai le Atua, maua pea le soifua tului i lau

Afioga aemaise o le Falelua o lo outou aiga e faaauau ai o otouou faiva mania aua le mamalu o Samoa. Ia

faatamaoaiga ina pea e le Atua la outou tofa ma le faautaga aua le fefaataaloloi i totonu o le atunuu.

Ia manuia foi lo outou aiga malofie, ae matou maloloina i le alofa o le Atua.

Soifua:

Ua tulili le tai ua gatalitalia le gataifale, aua ua matai'asā le tiuga ua matolupe foi le seuga. Ua lomaloma la le tai sua ua fotupule le tai o tumua ae tua'aumafiamalu le tai o le Tuiatua. Aua lea ua nofoia le puga o saunoaga, ua so'oula foi le fala, ua tumua le tupe i lumaga, tau le ai o saunoaga e pei o le upu ia Togiaulugaga. O lea ua

fana'elupe le la, ua atoa tino o le tama o Va'atusili sa taoto i le ana.

Ae o le a fa'agafua ia lo'u nofoaga ae magalo se taualaga, ae se'i ou liliu ane e fa'aiilo lupe o le taeao aua le fa'aaloalo maualuga o le alititeao ma le usu fa'aaloalo a le afioga i le Tuiatua Fa'anofonofo. Le Tofa le Matua ia Fuataga, Afio mai ai le Maupū o le Tui'a'ana, ao se tugase na affio mai ai le Falefia o alii, Maliu mai ai vae o le tootoo ma le mamalu o le Faletolu, ae a le fetalaiga a Saleaumua. O ava sa fa'ananasua aua le fefā'ata'aloloa'i o Pule ma Tumua, ae leoleo ai le galuega paia a le Atua. O ava e le so'ona tatalā e faa-polopolo aua le Tuiatua. O ava e usui le la ae tofa i maota ma laoa. O ava sa tōtō i le tumutumu mauga ae lulu lona ata i auvae mauga. O ava sa tu fātianiu tu i Malaefono aua le Tuiatua faanofonofo, ae alagaina e Saleaumua ma tootoo.

O le ava lea o le ava e tele i ai tala, aua o le ava e fai lona gafa. O le ava e mamana, aua o le ava e feai ona aa o le āva o le otigatagata. Le āva lea sa alititeao ai Tagaloa Ui

FOLAFOLA AVA. (Ava o le usu faaaloalo a le Afioaga o Lalomamu I le Malaga a le Matagaluega o le Soifua Maloloina)

Ua tulili le tai ua gatalitalia le gataifale, aua ua

matai'asā le tiuga ua matolupe foi le seuga. Ua lomaloma la

le tai sua ua fotupule le tai o tumua ae tua'aumafiamalu le

tai o le Tuiatua. Aua lea ua nofoia le puga o saunoaga, ua

so'oula foi le fala, ua tumua le tupe i lumaga, tau le ai o

saunoaga e pei o le upu ia Togiaulugaga. O lea ua

fana'elupe le la, ua atoa tino o le tama o Va'atusili sa taoto i le ana.

Ae o le a fa'agafua ia lo'u nofoaga ae magalo se taualaga, ae se'i ou liliu ane e fa'aiilo lupe o le taeao aua le fa'aaloalo maualuga o le alititeao ma le usu fa'aaloalo a le afioga i le Tuiatua Fa'anofonofo. Le Tofa le Matua ia Fuataga, Afio mai ai le Maupū o le Tui'a'ana, ao se tugase na affio mai ai le Falefia o alii, Maliu mai ai vae o le tootoo ma le mamalu o le Faletolu, ae a le fetalaiga a Saleaumua. O ava sa fa'ananasua aua le fefā'ata'aloloa'i o Pule ma Tumua, ae leoleo ai le galuega paia a le Atua. O ava e le so'ona tatalā e faa-polopolo aua le Tuiatua. O ava e usui le la ae tofa i maota ma laoa. O ava sa tōtō i le tumutumu mauga ae lulu lona ata i auvae mauga. O ava sa tu fātianiu tu i Malaefono aua le Tuiatua faanofonofo, ae alagaina e Saleaumua ma tootoo.

ma Pava i le toganiu sa, ae fono i le tagata. Le ava lea na talalua i le vasa, toe taumafai si a la ausaga, tauuu i Finao tōtō le ava, le ava lea e iai le fotua'iava ma Poga'iava. O le ava fai mai sa tanu i lalo o le valusaga tupu lua ai le talo ma le ava. Toe alu le ausaga tauuu i Faleu ma Utuagiagi, le ava lea na agatonu ai Seiuli ma Taulapapa TapaTaumeasina ae aumaia se ufanafana. Toe alu le ausaga tauuu i Aana, le ava lena na alofisā ai le Tuiaana Tamaalelagi i Nuuausala ae patipatia e i laua na Ta'i Tutuila ma Ape, ona toe lumāava ai lea i Leulumoega e Suluga ma Pasēsē ma Umaga. Le ava lea fai mai na tōtō i le Vaimauga ae suatia e le isumu ona aa na mafua ai le malae o le niniva i Ma'alauli ma Punialava'a. Le ava lea sa alofisā ai Malletoa ma le Tuumanu'a i le tai samasama na mafua ai ona mai vai ae suamalie ava i le alofa o le Atua mamana. Ia o le taeao nei o lea ua maua lo tatou ava. Ma ou te manatu ua le o le ava la lo tatou anoi ao le tagata.

Sila'alofi maia le paia o le faigamalaga, Le Sūstū i lau Afioga Je Fa'atonusili o le Matagaluega a le Soifua Maloloina i Samoa, lau Tofā Leausa ao se maihoa i lau Susuga i le Alii Foma'i ma le mamalu o le aumalaga. O le a ou tautala i le fā'aaloalo maualuga ma le ma'au lea ua opea i lumā'avasii o Tumua nei. Ua i ai lupesina e fa, lua latasi, ma ava felafaoi ua mago faala, a ao le malae ua lava ma totoe ma o le a fai i ai la'u pule. O le a te'a le tugase lea ia Saleaumua aua le laulau. O le lupesina lea o le a tea aua se ava o le ipu i le Afioga i le Fa'atonusili o le Soifua Maloloina. O le isi latasi lea o le a tea i le Susuga i le Alii Fomai, le Afioga ia Toleafoa. O upu a Samoa e ese lava le

Puniloa e ese foi le Punimatatogo, ona fa'apea lea o se fa'amatalaga, o le isi latasi lea o le a te'a atu i le la talaga aua se ava o le ipu i le Afioga i le Tuiaua Fa'anofonofoe faigata le tapuaga i le Matua o Fuataga.

Ao ava o lo'o toteo o le nofonofo ma Leulumoega i luma nei aua e umi lavasiga o lo tatou taeao.

Manuia le taeao.

TUMAUI LE MEA UA AOAONIA AI OE.

(Lauga sa tulaga muamua i le tauvaga aoga
maualuluga (Kolisi Sagato Iosefo 2013)

O upu e fai i le tuāvao, ua liligo le fogatia, ua paū le tuaau mafiamalu, aua ua alitia le tuāvao ua nofoia atu tias e alii seu.

O upu e fai i le gataifale, Ua tulili le tai ua gatalitaliā le gataifale, aua ua mata l'asā le tiuga. Ua atu ē foi le i'a a le tautai. Ua tau fai mapu'e foi le matila ma le ofe loa.

Ao le tala a le Fai-salamo, ua tala mai le lagile mamao o le Atua, ua fa'aalia foi e le vanimonimo galuega mamana a ona aao. Ua ou manatu ua faapena le asō, i le affio i a outou afioga i Faamasino, le mamao o Samoa ua potopoto i le malae i Matagialalua nei e molimauina le Aso o

Aganuu a Samoa. Aua o lea ua Talaleomalie le suafa o le tamaitai Ātua i le asō, aua ua tatou tepa i ula ua tago i ula ua tatou futifutimanu ula i le soifua manuia mai le Atua. Goga lata le vīga o le Atua, ae sei talatalafilu le sega a le Malietoa ma sei tau faailo se manatu o Sagato Iosefo e tus ma le famoemoe o le asō.

E faapea se autu ua fiffilia. TUMAUI LE MEA UA AOAONIA AI OE. TUMAUI LE MEA UA AOAONIA AI OE E mafai foi ona ou faapea atu, Tumau i lou faamasinomaga ma au agatausili ua aoaoina ai oe. O le mau a Samoa, o le tama ma lona aiga o le tagata foi ma lona faasinomaga, o lona uiga soo se tama ma soo teine Samoa e ulufafo atu ma le fale o ona matua, ua uma

ona aoaoina lelei i measina ma oa o le aganuu a Samoa. Aua foi o le faleaoga muamua lava lea o le tagata o lona aiga, O i na e aoaoina ai le tama i aga ausili a lona aiga, aemaise o agatausili a lona niu ma lona atunu, sosoo ai poo le Faakerisiano, ae mulia'i i le aoga papalagi e

aoaoina ai le poto salalau ma agavaa eseese mo le agai i lea ma le aoga a le faifeau e aoaoina ai agatausili faa le lotu luma o le humanai o le tagata, seja oo atu lava i le lunivesete o le taunuuga maualuga o le ola aoaoina e taurinio i ai tupulaga, ona o le fia faapaleina ma ia faacaina.

E ui lava la i nei mau aoaoga uma, ao le aoga aupito sili ona faamemelo i ai le Samoa, o lana aganuu, e aoaoina ai le tauatala, o le tu ma nofo faapea foi ma le savali, o le va fealoai ma le ava fatafata ia aua nei mou atu lona tāua, a ia faatumauina lona mammalu.

E aoaoina le talavou, e tapu le va o le tagata ma le Atua, e tapu foi le va o le tagata ma lona siosiomaga aemaise ai o le va o le tagata ma le isi tagata. E aoaoina e ai le tuaoi o mea uma e iloa ai le tagata ona ava ma fāaloalo i le isi tagata, e mafai ai foi ele tagata malosi ona fesoasoani i le tagata vaivai. O se tasi o aoaoga taua, O tamasā ma augafa'apae o le feagaiga tausi lea a tama tane, e atagia ai le tapu o le va fealoai o alii ma tamaitai aua o le iomata lea e teu mau i lona fatu. O le tasi lena aoaoga faavae e tatau ona tausia ma tumau ai, lea ua faigoaina o le feagaiga. E lasi aoaoga ae aumā na aoaoga uma pe afai tatou te le tumau ai. E mafai ona avea na acaoga o se timu e to i vai pe afai e noa i tatou ma le alofa.

O le a sau silasila i nei aso, ao le a sau faafofoga i tala feaveai e le savili i lenei vaitau o le talutulu fou, o tumau nei aoaoga, afai foi o tumau ao toe i ai sona mamalu.

E manatu le failauga ua manunu le toau o ufi, ma ua tauosa fāameataitai a tamaiti i le auala, ma ua pei o se fai e fāfao i le ato e pupu solo ua salalautasi i le ala. Aisea? Utupu tele le atamai ma ua saosaoa le oo mai o aga faapapalagi, ua lolofi mai faa-taifana' e ua galo ai aoaoga aoaoina ai e matua. Ua mamulu atu lona ttau ma uata'ufa'atauvā'aina e tupulaga le nanea ma le sosia o le tuualalo faa-matua. Sei silasila la oe i ai.

O le telefoni feaveai ua le mamulu ese ma le lima o le talavou, ua ola ma faatonutonu e le tomai fāatekonolosi, emoe i le facebook, ae alafai mai i le I LOVE YOU... o fētusitusia ia ua toulu faalau ulu o le tuāloa, i le ao ma le pUa galo ai aoaoga na faavaeina ai lona olaga, ao setuumumusu foi a si tocaina ma si loomatua i aso uma, ua leai. A fai atu i le telefoni ma ana mea faalogo e tuu i talig ua le lelei ai le faiga o ni feau, ae fai mai, se mom o lea e faa-sekiseki ai au fika. Talofa e, o ā au fika e tau mita 'i ma Ua faatusatua e tupulaga le maualuga o lona aoaoina ma le naulugia o le Vasega fa sa gata ai le aoga a lona tima Ua matuā galo nimo le mea sa aoaoina ai o ia.

O faafitauli ia ua faigata ai ona toe foi le tama i lona faasinomaga, ma ua sofaese ai le teine ma lona aiga, e pei se vaa ua motu ma le taula ma se ia ua leai sona siusiu. O mea moni Samoa ua tatou tapisa i nei mea, a ua faigata au ua i fale le matega. O le a le taunuuga o le lē faatumauina aoaoga sa aoaoina ai? A hele ua toatele fanau teine ua le

una aoga ona ua maua i le māitaga, ae a Tafaigata lele ua tumu i tupulaga ona o le mau solitulafono aemais e le mariuana. Fai mai foi ua poto, ae o si ou fasi poto lena ua faaupuina e toeina o le poto moto.

Talavou o lou tumau i le mea ua aoaoina ai oe, o le puna lea o manua e oo atu i lou olaga. O lou tumau i le mea ua aoaoina ai oe e fanau mai ai i le fāaeaina ma le fāpaleina. A fai e fesili atu se tagata ia te oe i sou manatu, ia e tali i ai i le manatu o lou aiga, tali i ai i le manatu o ou matua, tali i ai i le manatu o alii ma fāipule o lou afioaga, tali i ai i le talitonuga o lou Ekallesia ma agatasili a lau aganuu, ona faatoā fa'aali mulimuli ai lea o sou manatu, ae aua e te taliina le fesili i lou lava poto , aua e te oo ai lava i le mea e te toe tagi ai mulimuli a ua tuai, ona e fāia loa o letala a tamaiti...AGA OU ILOA A...Talavou, tali le fesili i mea ua uma ona aoaoina ai oe, e laveaina mai ai oe.

Talavou, o lou tumau i le mea ua aoaoina ai oe, o lou faasinomaga lena, o lou ala foi lena i malo. Fai mai le aoaga a le poto o Solomona, Lou atalii e, aua nei galo ia te oe iau tulafono, a ia tausia au poloaiga i lou loto, aua e faaopopoina ai ia te oe o aso e tele ma tausaga e te ola ai. O le taunuuga lena o le tagata e tumau i le mea ua aoaoina ai, na te maua faamanuiaiga a le Atua i lona olaga.

SOIFFUA.

Tusia: Faumuina Manu Samuelsu.

Laugaina e Atlas Atonio. (SJC Vice Head Boy)

LAUGA: O LE TELEFONI FEAVEAI UA FAIMA TA'I O LE AFL

(Internal Assessment Year 13. Samoa College).

FOLASAGA

Ua lūlūga le tai o atoa, ina ua manu i'a o le tua'au, a ua se i'a e moe mauga o Salafai, aua ua mata i'asa le tiuga ua mata lupe foi le seuga.

Ae ou te lei soso faina foi le lualoto nai le Tuamasaga, e muamua ona ou taia le Taifaitoa e pei o le ava nai

Utumalama nai Amoa. E muamua foi ona ou uftia ulutao aua le maota tulutulu i tao ua so'o ona taiao. Ae tau ia ina ia mātu le vaiavea ma le lauti le putea e pei o le fetalaiga i le vaifanua o le Tuiatua Vimoto. O paia la o le taeao ma le aso e leai se toe aleale aua o lea ua nofoia tiaseu e alii seu.

Ae o le a taoto pea ia fa'ai'a o tailoloto paia ma mamao le asō, i le sūsū i lau Susuga i le Alii Pule. Lau Susuga Reupena Rimoni. Le mamaalu o le aiga faiaoga. Susu lau Susuga i le faiaoga o le Gagana Samoa e fitoi tonu i ai lenē faamoemoe, Lau Susuga Selu Tuuala, aemaise o tama ma teine o le Kolisi o Samoa.

E'e maia i ou epaga o fa'afogafoga'aga, ae sei tautino le solo a le tamaloa, ma talatalafulu le manu mai A'ana i le manulauti ma le ute o le asō.

Ou te fia fao gaina e fai ma autu le mataupu: **O LE**

TELEFFONI FEA VEA'I UA FAIMA TA'I O LE AFL

Ua manunu le toau o ufi, ua solo le falute ma ua masof foi le fa. O le a la se isi mea e mafai ona toe tapu'e ma faleleia ai? Aua o lea ua i fale le matega ma ua ola le ha'au

fale. Ua o'o mai i totoru o ta laufanua le fa'afitaui ma ua sosolo fa'aafi e le matineia. Sa momoe i manū ae ua sau mala e ati a'i.

Na tagisia foi e Laulu se vaa ia goto. O le manaoga foi o le malo ina ia o fa'atasi le atunu o Samoa ma le lalolagi i faiga fa'atekonomosi fa'aneiona po. Afai e maua i Amerika ma Niu Sila e tatau foi ona maua i Samoa. Afai e aoga i Upolu, e tattau foi ona aoga i Savaii. O lagona lelei ma ni atinae aoga, ae lafi mai ai tua ona to'atugā, o faigata, o fa'affauli ma puapuaga.

O ala o fesoootaiga vavave fa'anei ona po o se mea lelei ma aoga e ala i le fa'aogaina o telefoni feavea'i, peitai ua taff mai ai ma auma o suiga fou ua fai ma faapaia mata i le atunu. Ua faigofie ai ona maua feso'otai a tama ma teine ma ua latou taupuleima ai ma faatino nisi faiga le talafegai ma le vaivai e o'o atu ai lava ina latou fiafa nisi amioga mataga ma le lē taualoa, aemaise o le gagana o loo latou fa'aoga.

E moni lava le upu a le Fatu Pese Samoa a le Punialava'a. E le o mea uma e ilia o auro ia. E le o mea mananaia uma foi i le vaai, o mea lelei ia ma aoga. Ae ua pei o se mātau a le fai faiva o loo mau ai le māunu e tosina i ai le i'a, ae galio ai e masae ai lona laugutu ma sisi fa'atātā ane ai ma ia i luga, o le muta'aga foi lea o lona ola..

Ua fātitio le tele o matua aemaise lava i le itu pa o tina, po'o le a le mea na aumai ai fua nei telefoni feaveai i Samoa ua leaga ai olaga o tupulaga. Ua fa'aoga telefoni e tuu ai i luga feau tusitusia e tauanau ai e le tama le tamaitai i ni faigano e le faavaea i se alofa ae ua fai fa'ata'aloga i

vai ona o le malosi o le tuinanau. O talanoaga i luga o tusi foliga (face book) ma upega tafailagi (internet), ua faavae ai le tele o faigauo ma ni mafutaga e iu atu i ni fa'afitauli e pei o le to po'o le maitaga ae lei fa'aipoipo, pe o le to foi o le teineifiti ae lei uma ana aoga. Ua malepelepe ai nisi o aiga ma tetea ai nisi o ulugali, ona ua text fua le isi tamaloa i le tautoga a le isi toeaina. Ua paū ai ma talai pelaue o nisi o failotu ona ua fetā'a'i solo faalou le magā lona mafaufau i faiga a le upegatafailagi ma vaivai ai lona faatuatua.

O se mea faigaluega aoga ma se auauna fesoasoanai ia te oe i le tele o taimi, o se avefeau televave ma le saoasaoa na te momoliina ou manaoga i le sekone i tuluiga o le lalolagi. O se laveai foi ia te oe i taimi mafatia ma tiga o le olaga. Ae o le fā'atupu fā'alavelave ma se fasioti tagata numera tasi na te fā'amutaina lou olaga.

Tupulaga talavou, o lou fā'aoga sēsēina o le telefoni feavea'i, e faamutaina ai au aoga e aunoa ma lou mauaina o le sini autu o lou olaga. Na te aumaiia ia te oe le ma'asiasi ma le inosia. Na te totoina le tiga i lou loto, ma tupu ai lou fia sola ese ma le olaga. E ta'e ai lou fatu ma salalau tasi seia oo ina e le toe mafaia ona toe aoao mai. E o'o mai ai ia te oe le attatuvalue ma le lē mauttonu i nisi taimi, aemaise ai o le fia pule i le ola pe a o'o ina lofiuitua ou lagona i le ma ma le masiasi ina ua fa'asallalau e le telefoni i peau o le ea ou fa'afitauli e oo mai ai le masiasi.

E le natia le mea na tupu i nai tausaga ua mavae atu, ua salalau i luga o le ea ma nusipepa ma ua silafia uma e le atunuu e o'o i taitai o Ekalesia ina ua faaogaina e tamaiti

aoga ni ata leaga ma fepasia'i solo i luga o telefoni feaveai. O le a lona taunuuga, na iu i le tauvalea ai o matua, o le nuu ma le Ekalesia aemaise ai o le Pule aoga ma le aoga o lo'o aoga ai.

Le matautia lea o le Telefoni feavea'i ua mafua ai ona ala le mafua, ma sosopo le manu vale i le fofatia seu o alii, ona ua i fale le mattega ma ua ī le manu tuluia. O le mea lea ou te tu'itu'i malofie ai i lou finagalo pe tefā le tauala ma toe sasa'a le fafao. Fai sau filifliga poto ma le sa'o mo lou manua. Aua nei o tatou nofoa'i ae tatou saili se fōfō o le gasegase nei toe oto atu lou pulou a ua to timuga. E tagi fua Vi a ua le aoga ua oso ma Eneli. Va'ai lou fa'asinomaga ma Jau Aganuu aemaise o lou Fa'avae papa ma lou taupega afā. O IESU KERISO O LOU ALA LEA I MALO.

Toe mafaufau tasi lava ma ia fai loa sou amataga fou nei e tuai.

Soifua

Tusia: Shalom Faumuina Manu Samuelu
Yr 13.1 (2013).
SAMOA COLLEGE

TALA TU'U ILLOGA A SAMOA

**O LE TALA ILE PAEGA UO A LE FANAU A
TUIA'ANA FAUMUINA E ANA LE TUPUFIA MA LE
TAUA O LE PEPE VE'A.** (Ma tofiga na maua mai ai)

PAEGA UO

Ua tafafā uma nei le fanau a Faumuina, Ua Tafafā Fonoti, Tafafā Samalaulu, Tafafā foi ma Toleafoa. Ona papae lea o a latou uō i Leulumoega. Ua papae le uo a Fonoti i Nu'uausala, ae papae le uō a Samalaulu i Falesama, ae papae le uō a Toleafoa i Malaeloa. O Fonoti sa pae uō ai Aiono, Misa ma Futia o Toleafoa na usu a'e i ai Alipia. Ona fāapea lea o Toleafoa ia Atamaiola'i, alu ia Samalaulu e ta'u i ai o lea ua usu mai Alipia i le paega ue. Ona fāapea lea o Samalaulu, fa ita nei o ai, afai ua usu mai Alipia i le uo, o le a Matuanatogi i le Faleiva ae auga i ai upu o Leulumoega. Afai e tauva Leulumoega i le faletui, o le a fa'aola totoga Alipia, o le a ava uma i ai nofōa o Leulumoega ia te ia. O le mea lea ua taua ai Alipia o le Avaganofoa. Toe usu atu Tanuvasa i le uo, ona toe fai atu lea o Toleafoa ia Atamaioali'i, toe alu ia Samalaulu e ta'u i ai o lea ua usu mai Tanuvasa i le uo. Ona tali lea o Samalaulu, fa ita nei a o ai ma ai, afai ua usu Tanuvasa i le uo, o le a Tanuvasa ma Aana, o le a Itulua i ai Aana.

O le mafuaaga lena na moa ai le Faalupega o Alipia o le Matuanatogi, sa amata mai ina ua tuu i ai e Tutuila ma Apē le Tamalelagi na te tauisia lea na toe faamautina e Samalaulu, ma ua cvea ma tootoo taua o Leulumoega. O le mafuaaga foi lea na maua ai le faalupega o Tanuvasa, E itihua i ai Aana. A i ai lava Tanuvasa ua atoa Aana

TAUA O LE PEPE VE'A

O nei mea uma na fai ina ua feitana'i o Fonoti ma Toleafoa ma Samalaulu. Ona au toalua lea o Toleafoa ma Samalaulu, ae au toatasi Fonoti. O lenei fē'ese'eseaiga, na mafua mai i le Pepeve'a. Na ita Toleafoa ina ua manao e ave le pepevea i lo la tuafafine o Samalaulu, ae musu ai Fonoti, ona tau ai lea o lo latou taua, lea ua tāua nei O LE TAUA O LE PEPEVE'A. O le taua lenei na maua ai le āava a Faleata e fevala'aua'i, na maua ai foi ma le tofiga o Faleata. O le Ituau tasi ia Lufilufi ma Leulumoega ma Tuisamau.

Ua iu lenei taua ma ua tojalo Samalaulu ma Toleafoa, ae manumalo Fonoti, ona molia ai lea o Toleafoa i le motu o Tutuila, ona ita ai lea o Satumumafono ina ua logotala, ma latou malaga ai loa lea i Tutuila e a'ami la latou tana i lo latou lava malosi. Na malaga Toleafoa ma Alipia, o le tulafale lea na alu e momoli le alii i Tutuila ona la nonofō ai lea. Na o'o i le tasi aso ua vaai atu Alipia i le fā'i, ona fāapea lea o lana tala: Amuia lenei fa'i ua puipui e lana fānau, ao lenei ua ou sau toatasi ma le feagaga ma tapa'au, ae nonofō fa'asaoloto la vaotagata e i Upolu. Toe vai atu Alipia i le moa, ua mulimuli uma lana toloai ia te ia. Ona

faapea lea o Alipia, amuia o lenei moa e mulimuli uma ia ia lana fanau, ao lenei ua ou sau toatas i le feagaiga ma tapa'au. O i na maua ai le igoa o **Alipia Tausi mavaega**. Ona to loa lea e Toleafoa o le Igoa Ipu a Alipia e fa'apea.

AUMAI TUINOFO UA LAVA.

Ona taunuul loa lea o le amiga a Satunumafono i Tutuil e a'ami Toleafoa ma Alipia. Ma sau loa ma la latou faigamalaga i Upolu, na malaga mai Satunumafono ma Toleafoa, ao Alipia sa malaga mai i le isi vaa faatasi ma lona afafine o Toafei. Ua sau le malaga i le vasa ona fai at lea o le tasi o le aumalaga ia Alipia, ua to le va'a na i ai Toleafoa, ai ua gasolo ao ma ta'ape pāpā o le alii. Ona faapea atu lea o Alipia pe se tala moni lena tala? Ona tali atu lea o Satunumafono, o le tala moni lava ua maliu Toleafoa. Ona fai atu lea o Alipia i lona afafine o Toafei sau ina alu i Upolu ma le igoa ipu na to mai i lo'u alii, o Tuinofoualava ma le Alipia. A e o'o atu i Upolu, avane i Alipia ma le igoa ipu i le tama a lo'u tuafafine ia Tanuvas i Sagameauta i Nofoalii, ae o le a ou oso i le sami ma te o luu ma Toleafoa. Peitai e lei maluu Toleafoa, o le tala sesa na fai e Satunumafono ia Alipia.

TOFIGA A LE TUPU O FONOTI I MULINUŪ

Ua sau le malaga ona tutu lea o le vaa i Aleipata, ona logotala lea i ai o Fonoti o lo'o afio i Mulinuū i Lufilufi aumai e Satunumafono la latou tama o Toleafoa, ona atuatuvale lea o le tupu ai nei a toe fōua e Toleafoa lona nofōa. Ona fai atu lea o Fonoti ia Atamaioalii, sau ina so te a'u ma la'u fanau. Ao le Ao o le Tonumaipea o le a ia te i Aleipata, fai atu ia Toleafoa, la vase mai nei ma le feilo taua ai le aumaga e paia ona o le ao o le Tonumaipea ua iai.

ua vaivai lo'u ma'i. Ona alu lea o Atamaioalii, ua fai ia Toleafoa: Na ou sau e te afio atu i le fa'atafa o le tupu, ua malomaloā le fa'atafa o le alii. Ona fai atu lea o Toleafoa, ou te le mafai ona alu atu. Ta'u atu i le tupu ou te le alu atu. Ona toe foi lea o Atamaioalii i Lufilufi ua ta'u atu i le tupu, e le sau le alii, o lo'o to'atama'i. Ona alu ane lea o le sopoaga a Toleafoa ma Satunumafono i Falealili. A ua toe fai atu Fonoti ia Atamaioalii, sau ina toe alu, fai atu ia Toleafoa, e afio mai ua vaivai lo'u ma'i, a nei ma te le feiloai. Ona toe alu foi lea o Atamaioalii e logo Toleafoa i le manaoga o le tupu. Ua ou toe sau foi i le feau a le tupu, e te afio atu i lona fa'atafa, ua vaivai, a nei lua te le feiloai. Ona faapea atu ai loa lea o Talo i Falealili, Toleafoa, sau ina e alu i le gasegase o le tupu, sei lua fesilafai. Ona sopo ane ai loa lea o Toleafoa ina ua loto i ai Talo ma Satunumafono e alu Toleafoa sei asi le gasegase o le tupu. Ua taunuul Toleafoa i Lufilufi, ua nofō i le togāulu a ua le sau i le fale. Ona fai atu lea o le tupu Afio maia i fale nei sei ta filifili lelei ai. Ona fa'apea lea o Toleafoa, Pau maia ni au malelega ma ni au agiagi, ou te le alu atu i fale na, aua tumua. Ona fai atu lea o Fonoti ma Tumua, afio mai i fale nei sei lua feiloai ai ma le tupu. Ona sau ai lea o Toleafoa ua nofō i le pepe o le fale i le pito i tua. Toe fai atu le tupu, afio maia i lou Tapa'aufa'asina lea, o le a tofi a ta mea ina ia nofō lelei ai o lou fanau ma la'u fanau.

O le a e afio i le fala, ma na o oe lava e te nofo i le fala i
fāfō o le malae, e sa se isi o le aumaga ona nofo i se fala. A
uma ona mama o le ava, e tu lava le tagata i luga ma lana
maga'ava ma tuu i le tanoa, ao lau āva e tu mai se tasi na t
avatua ma tu'u i le tanoa, ona aumai lea o le tanoa e tu i ou
luna.

A leai se tupu e alagaina e Tumua o le a e Tuia'ana aw
au malaga. O le a faasino foi ia te oe upu o aualuma. O lou
aualuma o le a tausi e Leulumoega ma i laua na ta'i
Fasitoo-tai ma Fasitoo-uta. A e toe tago mai i a'u mea, on
sāua lea o oe i le aufiefue ma soloia i le vailalo. Ae afai o
te toe tago atu foi i au mea, ua sāua a'u i le au fuefue ma
soloa i le vailalo ma lau fanau.

*O mavaega ia sa faia i Mulimū i Lufilufi a le tupu o
Fonoti.*

A le vaitaimi o le tulai mai o Tuia'ana Vaema i
Leulumoega ma Aana na alu ai le fale tautu o Tutuila ma
Ape ia Tuia'ana Vaema i le tamaitai o Vaetamasoa le alo o
Sanalala i Safata, peitali sa le taliaina e le tamaitai le
manaoa ona e inoino le tamaitai i le vae o le ali'i ona e iila.
Ona alu ai lea o le malaga a Tootai ma Toouta (*Tea na suia
o la igoa ia Tutuila ma Ape*) i Savaii e tau saili so la ali'i e
fa'aauau air i le la fale tautu ia Vaetamasoa. Na toai i Amoa
peitai, sa agaleagaina ma le fafagaina i laua i le fetii popo a
Amoa. Ona fai atu ai loa lea o le faatonuga a Letufuga i
Faga ia Tootai ma Toouta (Tutuila ma Ape), e o i Safune e
aumai Selaginato le atalii o Tagaloa Faafonuu i le aafafine
o Letufuga e fai ma o la ali'i. Na taliaina lelei e Tagaloa
Faafonuu le manaoga o Tutuila ma Ape ma omai ai loa
ma le tama i Aana. O le mafuaaga lena ua avea ai Safune
ma Taulaunu ma se tasi o vaega o le usoga a Tutuila ma
Ape. O ina foi na mafua mai ai le suafa o
Taulealeausumai. O le tama na faatonu e Tagaloa, e usu
mai i taeao uma i le maota e tausi le Malaga ma fai feau a
Tutuila ma Ape.

Ua taunuul le malaga i Aana ona faaauau ai loa lea o le
fale tautu o Tutuila ma Ape i Safata i lo la ali'i o Selaginato
i le tamaitai o Vaetamasoa le alo o Sanalala Sa talia loa e

**OLE TALIA TUIA'ANA TAMA'ALELAGI,
SO'OAEMALELAGI MA LE MAFUAAGANA
TAFAIFA AI SALAMASINA.**

**Fale Tautu a Tutuila ma Ape ia Vaetamasoa
(TUIAANA TAMAALELAGI).**

O le vaitaimi o le tulai mai o Tuia'ana Vaema i
Leulumoega ma Aana na alu ai le fale tautu o Tutuila ma
Ape ia Tuia'ana Vaema i le tamaitai o Vaetamasoa le alo o
Sanalala i Safata, peitali sa le taliaina e le tamaitai le
manaoa ona e inoino le tamaitai i le vae o le ali'i ona e iila.
Ona alu ai lea o le malaga a Tootai ma Toouta (*Tea na suia
o la igoa ia Tutuila ma Ape*) i Savaii e tau saili so la ali'i e
fa'aauau air i le la fale tautu ia Vaetamasoa. Na toai i Amoa
peitai, sa agaleagaina ma le fafagaina i laua i le fetii popo a
Amoa. Ona fai atu ai loa lea o le faatonuga a Letufuga i
Faga ia Tootai ma Toouta (Tutuila ma Ape), e o i Safune e
aumai Selaginato le atalii o Tagaloa Faafonuu i le aafafine
o Letufuga e fai ma o la ali'i. Na taliaina lelei e Tagaloa
Faafonuu le manaoga o Tutuila ma Ape ma omai ai loa
ma le tama i Aana. O le mafuaaga lena ua avea ai Safune
ma Taulaunu ma se tasi o vaega o le usoga a Tutuila ma
Ape. O ina foi na mafua mai ai le suafa o
Taulealeausumai. O le tama na faatonu e Tagaloa, e usu
mai i taeao uma i le maota e tausi le Malaga ma fai feau a
Tutuila ma Ape.

Vaetamasoa le fale tautu. Ua nonofo Vaetamasoa ma Selaginato, ona to ai loa lea o Vaetamasoa ia Selaginato ao nonofo i Safata. Na faalogo Tutuila ma Ape ua latalata le taimi e fanau ai Vaetamasoa ona la o ai loa lea i Safata e gaoi mai le tama, aua o le tama o le a fanau mai e tau tupu lona grafa. Ona latou taupule ai loa lea ma Taelegalolo i Safata i le auala e gaoi ai le tama i le taimi e fanau ai. O Ape ua ofu lona tiputa ma ufiufla lona ulu, ma ua faafoliga se tamaitai ma ua ia faatafa faaleiloga i tototunu o le fale faatasi ma faatosaga i le maota o loo fanau ai le tamaitai o Vaetamasoa. Na fanau loa le pepe, tago atuu le faatosaga tu mai le tama i le fafine o loo i ona autafa ma lona manatu o se tasi o le latou vaega faatosaga, ae tuu sao mai lava i limo o Ape, ona tuu mai loa lea e Ape le pepe i tuapola o loo latuu ai Tutuila, ma tamoe ese atuu loa ma le pepe ma alu loa ma le solaaga i Aana. Na iloa mulimuli ane e le maota ua leai se pepe ona alu loa lea o le tuliloaga a Safata e saili mle pepe, ma faia ai loa le taua tele a Tutuila ma Ape ma Safata i le tuasivi. O le taua lea na logotala i ai Lio le tuagane o lo la tina ma ia faavave mai ai loa e fesoasoanii le taua. O le taua lea na maua ai le igoa o Liollevave o Talimatasi. O le taua foi lea na tāua ai Lio, o **le tama e ana le aveave**. Na alu le sola'aga ona malolo lea i gauta o Falese'ela i le nofoaga e taua o Leili, ona paū ai lea o le pute o le tama, ona tanu ai lea e Tutuila ma Ape le pute o tama i lalo o malala o le la afi sa tafu e tunu ai latou mea Ua maua ai loa le igoa o lena oga eleele e oo mai i le asō TANUMALALA. Na toe faaaau pea le malaga a Tutuila ma Ape ma le la tama ua malosi mai le vewela o le la, ona

fafati lea o le launiu ua faamalumalu ai le tama. Na alu pea le malaga ao loo fafaga lava le pepe i suaniu ma aano mama talo ma fa'i, ona latou malolo lea i gauta o Fasito-uta, ae faalogoina le ūlo mai o le lupe, ona saili loa lea e Tutuila ma Ape po'o fea se mosooi o lo'o ūlo mai ai le lupe, peitai na faateia i laua ina ua vāai atu o lo'o ūlo mai luga o le ūlu, ona faigoa foi lea o lena eleele o **ŌLOŪLU** e oo mai i le asō. Sa faaaau pea le solaaga mai Safata Tutuila ma Ape ma lo la alii o Tamaalelagi ona malolo lea i lalo o le lau ona susue lea e Tutuila le siapo o loo aui ai le tama ae pulapula ane ona mata, ona faapea lea o Ape se omata lava o le toa mata o le alii, ona maua ai lea o le igoa o aso. Na toe faaaau pea le malaga a le au uso ma lo la alii ona la mapu ane teisi lea i lalo o le malu o le laau ma taumafai loa Tutuila ma Ape e tuu le pale i le ulu o le pepe e tau faapale lo la alii aua ua la iloa o ia lava o le Tupu Tuaana, peitai na vaai atuu tama e le talafeagai le pale ma le igoa o le fanua o loo i ai nei o **LEPALE**, o le eleele na faapale ai le palealii o le Tamalelagi, O le vaega tonu lea o lootu ai nei le malumalu EFKS. Na faaaau pea le malaga ua fāu lata atu i le aai, ona malolo lea sei fafaga le tama i le suaniu ma le aano, peitai e tuu atu le aano i le gutu o le tama ac toe hui mai i fafo ona maua ai foi lea o le fanua ua faigoaina nei o **LUAALI** i gauta o Fasitocouta e oo mai i le taimi nei. Na faassolo mai pea i tai le solaaga ua latalata ane i le aai i Fasitoo-uta ona tau talatata lea o le siapo na aui ai le tino o le tama ma la iloa ai ua palapala uma le tino o le

tama ma ona fōliga ona faigoa ai lea o le ogaelele lea i gauta o Fasitoo-uta o **PALAPALA**, le nofoaga tonu lena o loo tu ai nei le malumalu Assembly of God

Ua taunu'u le solaaga i tai i le aai i Fasitoo-uta o le nuu lea o loo nofo ai le tama o Toouta poo Ape ma tausi ai loa le tama. Ona sili loa lea o le siusiu launiu sa faamalumalu ai le tama i le pito i luma o le fale. O le mafua'aga lea so'o se taimi e faatino ai le auala po'o le o'otaga a Tutuila ma Apē i se tu'umalo o se alii taua, e ave le mele'i ma le niu faatasī ma le launiu i le fā'atinoina o la latou taulaga, e faaiu lava le galulega a le Falefitū i le sili o le launiu i le tālāluma o le maota po'o le laoa o lo'o tacto ai le maliu. U fai a lenei faatinoga e faamanatu ai mea una na tutupu i le aumaiga o le tama faatasi ma mea sa tausi ai le Tama'aletagi a'o sau le malaga mai Safata.

Ona fai ai loa lea o le lumāava o Tutuila ma Apē ma ^{lo}tao. O le tama na tausi mai le lagi ona faigoa ai loa lea e

la alii i le maota i **Malaetī'a**. O Malaetia i Fasitoo-uta na Tutuila ma Apē lo la alii ia **Tamaalelagi**. uluai patipatia ai le alofi o Tamaalelagi ma i laua na ta; i

Tutuila ma Apē. O le tele o taeao e patipatia ai lo la alofi ma lo la alii, e tuai atu lava Tootai poo Tutuila aua e nofo ia i Fasitoo-tai, e taunuutu ua uma ona alaga e Apē le awavau, e potopoto foi i ai ituaiga e fitu ma Sausi ma Samoa a Tamaalelagi. O ina na maua ai le upu, "Tutuila le mamate, ao Apē na Moemanatunatu". Ona faapea loa Leulumoega ma Tutuila ma Apē le Tuaana o Tama'aletagi

o le manatu o Tutuila e lelei ona sii le tama i Sagameautaao loo ia Sanate pāpā, ona lua ai lea o Tuaana ia atomu e faigofie mo ia e taulatalata, ona sii mai loa lea o Leulumoega. Peitai o le masani a Leulumoega i na ona po, tama. Ona maua ai loa lea o le igoa o lena nuu e oo mai iao tausia fā'atasi nei Tuaana, sa ave uma mea ai lelei ia asō o Nofoalii ona ua nofo ai o le tama (**Nofoalii o le Sagate**, ae ave mea ai leaga ma Tamaalelagi. Ao le taimi tama) E ui lava la ua latalata atu le tama i Fasitoo-tai, lea na vaetamaina atu ai le tamaitai o **Levalasi** le tama a le peitai ua tele lava taeao e le maua atu lava e Tutuila se aluso o lona tina e fai ma taupou a Tuaana Tamaalelagi lea

o le taeao. Ona faapea ai loa lea o le manatu o alii, e lelei ona ave le la alii i lalō i Matataō. Ona sii ai loa lea o le tama i Matataō, ae valaaulia ai loa e Alipia ma Suluga le

Tutuila aumai le tama sou tausi. Ona tali atu loa lea o Apē, tuu ia le alii iinei i le Tumua aua o ia e pule i le pāpā. Ona faapea lea o Tutuila, ua lelei Alipia o oe o le matua ua togia e tausia le alii, ona maua ai lea o le **Matuanatogī o Alipia** lea foi sa toe alagaina e Samalaulu i le paega uo a Alipia ma Toleafoa. O ina foi na suia ai loa le igoa o Matataō ia Leulumoega, ina ua faatu ai le Leulumoega o Tamaalelagi. O le mafuaaga o le igoa o le alii ia Tamaalelagi ona ina ua ma Apē mai Safata, e lei pāi lona fogoga i se susasusu ao pepe, ae na fāfaga i le suanuu ma le aano o mama fā'i ma

ma Apē mai Safata, e lei pāi lona fogoga i se susasusu ao pepe, ae na fāfaga i le suanuu ma le aano o mama fā'i ma

na sua lona igoa ia So'oaemalelagi. Ona faapea atu loa lea o Tamaalelagi ia So'oaemalelagi, sau ia ina alu i Tausunū ma Tauasotasi e fai ia Nafanua e alofa mai i lo ta tiga, ua ave lava mea lelei ia Sagate ae ua agaleagaina i taua na o mea leaga ua aumai. Ona alu ai lea o Sooaemalelagi i

Savaii ia Nafanua ma na talia lelei e Nafanua le savali a Sooaemalelagi. Ona faapea atu lea o Nafanua, sau ina alu e sii atu i e limā le taua, ae afai ae i ai ni ai o lena taua, ia tutu'i le alafale ae iu mai ia te au papa, ae aua nei nofo ai se Tupai aua oe le tamaitai.

TAUA O PĀPĀ: (Aana, Tuamasaga, Safata, Atua)

AANA:

Ua tau le taua a Sagate ma Tamalelagi, ua toilalo Sagate ae manumalo Tama'alelagi. Ona alagaina loa lea e Alipia ma Suluga pāpā o Tuia'ana Tamaalelagi aua ua ia i laua le pule, peitai o na pāpā na ave uma e Nafanua, ona nofo ai lea o Tamalelagi ua leai se pāpā ae na o lona malo ua savali i Aana uma. O le taua lea na faoa ai pāpā o A'ana e Nafanua.

TUAMASAGA:

Sa faapea foi ona faia le taua o pāpā o le Gatoaitele i Tuamasaga ina ua mana'o Malietoa Sagaga ia Tuisamau e fai ma ona tuitui ma faasaga mai ia te ia, peitai e musu ai Gatoaitele ma Tuisamau, ona o le mamaega a Malietoa Utualagi. Ona tau ai lea o le taua a Malietoa Sagaga ma Aumataki ma Gatoaitele ma Tuisamau, sa muaau Tupai ia Gatoaitele ma manumalo ai, ae faiaina Malietoa ma Aumataki. Ina ua manumalo le taua o le Gatoaitele ma

Tuisamau ona tutu'i foi lea o le alafale i Tanumafili e nofo ai Tupa'i e talia le tanoa a Tuisamau, e tuvao fono foi Tuisamau ia Malie ae le o Auimatagi, ona ave ai foi lea o Nafanua pāpā o le Gatoaitele.

ATUA:

Ua maliu Muagututia ona tau fai mananao ai lea o Foganiutea o Fagaloa ma Fogaozloula o Lufilufi I le Tuiatua ona tupu ai lea o le taua. Ona alu foi lea o le aveai a Foganiutea ia Tupa'i ina ia fesoasoani mai i le taua, sa logo e Tupa'i Nafanua ma malaga mai ai loa i Atua e tauina le taua o pāpā o le Tuiatua. Sa manumalo Foganiutea ona tutu'i foi lea o le alafale i Pulema'ava e nofo ai Tupai e fai ma nofoasā o le Tuiatua, ae ave pāpā o le Tuiatua e Nafanua.

SAFATA:

Na vevesi foi Satunumafono ma le Alataua, ona tagi foi lea o Satunumafono ia Tupa'i ina ia sau e tali lona tiga, ma logoina ai lea e Tupai o Nafanua i Savaii mo le tauina o le taua. Ua tau le taua a Satunumafono ma le Alataua sa tauina foi e Tupai. O le taua lea na toilalo ai le Alataua ae manumalo Satunumafono. Ona tutu'i foi lea o le alafale i Nuusiatialemanū e nofo ai Tupa'i e leo ai le alafale e fai ma agatonu o Satunumafono, ae ave pāpā o le Tamasoalii ia Nafanua, ae savali lava le malo o Satunumafono i le Alataua. O le malo foi lea na alu ane ai Ilmoa e tali pisi ia Alataua na maua ai lona faalupega o le Pitolua o Satunumafono.

SALAMASINA O LE ULUA'I TUPU TAFAI

Ua potopoto uma nei pāpā e fa o Tumua i Savaii i Fili ma Puletu'u ia Nafanua. Ona oo lea i le tasi aso ona faape atu lea o Nafanua ia Tupai, o maia ina ave pāpā ia e fa ia So'oamalelagi i Leulumoega, sei faataunu la'u upu na fai atu ia te ia e tutu'i le alafale i Leulumoega e igoa ia Iu mai Pāpā, ma o lea o le a iu nei papa ia Leulumoega. Ona malaga mai loa lea o Tupai i Leulumoega i Aana sei asia tamaitai o So'oamalelagi pe se a lona finagalo, pe a sili mea le seuga o le a fai nei i Safe'e. Ua tauunu le malaga i Leulumoega, vaai atu Tupai, e le te'a le teine o Salamasin ma vae o lona tina o So'oamalelagi. Ona faapea atu leao Tupai ia So'oamalelagi: Taumamao le teine lena mai ia oe, aua le solia oe aua ua lata ona aumai pāpā ia te oe. Atali mai So'oamalelagi, o fea o le a ave i ai si au tama ou te alofa tele i ai. Ona toe fo'i lea o Tupai i Savaii, ae alu ua faia le sēuga i Safe'e, ua faaiu le seuga ua sili mea seu ona toe malaga mai loa lea o Tupai ma Auvaai Leulumoega.

Ona faapea atu lea o Tupai, So'oamalelagi, ave ese teine ma oe o le a tuuina atu pāpā aua ua finagalo Nafanua e faae atu ia te oe pāpā e fa, ae tali So'oamalelagi, o le ave ea i fea si a'u tama ou te alofa tele i ai. Ona fesili loa lea o Tupai ia Sooa'emalelagi, pe e te loto ea ina ia avatu pāpā i si au tama o Salamasina, ona tali lea o Sooaemalelagi, loe ou te manao e faae e pāpā i si au tam Salamasina aua ua tele lo'u alofa i ai. Ona ave lea e Tupāpā ia Leulumoega na te fa'aee ia Salamasina. Ona TAFAI

lea o Samoa . Ona potopoto ai lea o Tumua uma i le tupu o Salamasina.

Ona tautū loa lea o le fale o Leifi ma Tautolo mai Aleipata i le tamaitai o So'oamalelagi o Levalasi lava lea, ona nofo ai lea o Mata'utia ia So'oamalelagi. O le aumoega lea na faatoa maua ai le igoa Mata'utia'atulou o foi na maua ai le upu, "Tau ia o se

mea e ala ai".
Mata'utia'atulou o foi na maua ai le upu, "Tau ia o se
mea e ala ai".

O LE TALA I LE TAFFA O LE UTU A TAUFIAU, A UA TUPU FAUMUINA.

Ua gasegase Tuia'ana Taufau le tupu ona ia fai atu lea ia potopoto uma ane lona aiga ma faleupolu, ae alu se savali faanatinati e logo lana tama o Tupuivao o loo ta'as i gauta o Falealili ma Safata, ia wave mai sei o la feiloi, a'u nei ua tafea lau utu".

vaivai lona gasegase nei tuai mai. Ona alu ai lea o le tili i gauta o Falealili e logo le tama i le manaoga o lona tina, a vaivai Tupuivao, ou te le alu atu, e le tusa le ma'i o tali ane Tupuivao.

Taufau ma lou mana'o fia seu. Ona toe foi mai lea o le tama ua ta'u mai i le tamaitai, e le sau Tupuivao.

Ona toe fiaapea foi lea o Taufau, toe alu se tama e log

LEULUMOEGA (AAANA)

si au tama e sau nei o ma le feiloi, e fa'i a ia ai o se ma'i fa'atauvaa lo'u ma'i, ua ou tigaina, ona toe alu ai lea o le faasaga loa lea o Leulumoega e teu ma tapena le malae aua amiga ma fai atu i ai ia Tupuivao ua vaivai le gasegase o le potopoto Aana. Ona aumai ai lea o nofoa e iva ua Taufau, sau ia ta o nei e le maua atu le tamaitai. Ona tal i fati'i i le malae. Ona filifili foi lea o Leulumoega i nisi e mai lea o Tupuivao, sau ina alu ae sei ou **talia lupe o pupula**. Ona toe alu foi lea o le tama ta'u atu ia Taufau, le malae i Ma'auga, ona potopoto mai lea o Aana. le sau Tupuivao, fai mai sei talia lupe o pupula.

E le'i sua lava le finagalo o le tupu, o loo naunu la o Leulumoega ua filifili ni sui e tietie i le nofoa mai ituaiga lana tama o Tupuivao e sau se'i tuu atu i ai tofiga. Ona taliasi. A oo la ina fai le faatau ona tütü faatasi una lava lea fai atu foi lea o le tamaitai, sau e toe alu, fai atu i ai laj'o totooo ia e iva ma fai la latou faatau i se tasi e filitagaga i tama e sau o le a ou ot. Ona toe atu foi lea o le feau, ua ai le sivaloa na te fai le lauga a Leulumoega, poo Alipia atu le tama ia Tupuivao, sau ia ta o ua vaivai lava le gasegase o le tupu, ua tali ot, ae tali Tupuivao ou te le lea i lalo ae tu na o le totooo o le a fofogaina le lauga a atu sei ou **talia lupe o maunu**. Ona toe alu atu foi lea o Leulumoega pe a maea le faatau tama tau atu i le tupu, ua le sau Tupuivao fai mai sei no talia lupe o maunu.

Ona fai atu loa lea o Taufau le tupu: Ina potopoto maia lo tatou aiga ma Tumua, faafogafoga mai i lau upu o le a paū atu. "O le a tafea la'u utu, ae au le utu a si o'u uso o Sina. Ao oe **FAUMUINA**, aua nei e fefe pe a sau le tamaloa fiasaua "aua e au Aiga ia te oe", e au foi ia te oe Faleupolu, a finagalo Tumua e te tupu, e te tupu lava, ao

Fammina tonu lena e ana le Tupufia, na tupu una lana fanau, Fonoti, Samatalu ma Toleafoa.

O LE FONO I LE MALAE I MA'AUGAI

Ona usu loa lea o le fono, ona o atu ai lea o ituaiga e iva alu le savali e logo le itumalo, e potopoto mai o le a fonoa Ona usu loa lea o le fono, ona o atu ai lea o ituaiga e iva alu le savali e logo le itumalo, e potopoto mai o le a fonoa

E le'i sua lava le finagalo o le tupu, o loo naunu la o Leulumoega ua filifili ni sui e tietie i le nofoa mai ituaiga lana tama o Tupuivao e sau se'i tuu atu i ai tofiga. Ona taliasi. A oo la ina fai le faatau ona tütü faatasi una lava lea fai atu foi lea o le tamaitai, sau e toe alu, fai atu i ai laj'o totooo ia e iva ma fai la latou faatau i se tasi e filitagaga i tama e sau o le a ou ot. Ona toe atu foi lea o le feau, ua ai le sivaloa na te fai le lauga a Leulumoega, poo Alipia atu le tama ia Tupuivao, sau ia ta o ua vaivai lava le gasegase o le tupu, ua tali ot, ae tali Tupuivao ou te le lea i lalo ae tu na o le totooo o le a fofogaina le lauga a atu sei ou **talia lupe o maunu**. Ona toe alu atu foi lea o Leulumoega pe a maea le faatau tama tau atu i le tupu, ua le sau Tupuivao fai mai sei no talia lupe o maunu.

Fasitoo-tai ma Fasitoo-uta i se tasi o le Falefitu na te talia le

Vaega 3

lauga a Leulumoega poo Tutuila po o Ape. A maea le laug
a le Falefitu ona auaua'i loa lea o tootoo o afioaga taitasi o
Aana. A maea lauga, ona toe tulai foi lea o se tasi o
Leulumoega na te folafolaina ava o le fono, ona tapati ai
loa lea o le ava e le nuu o Falelatai ma tapa ai loa lea o le
ipu a Misa. A maea ona taumafa le ava a Misa, ona la'u
mai loa lea o taumafa e tele o le fono a le ava a Misa e
Falelatai i totonu o le malae e ave ia Leulumoega. Ona
sosoo ai loa lea ma le ava a Vaili. Afai e alaga le ava a
Vaili ona tau fai laga mai lea o tagata e toatele e tausaili
solo le ipu e ave ai le ava a Vaili, e su'e solo i lalo o
togafulu, o sa lava ia ua masani ai le malae i Ma'auga. A
maea ona taumafa le ava a Vaili ona tapa loa lea o le ipu a
Afamasaga, ona ilia ai loa lea o pu e sefifulu ma o sa lava
na o le malae o Ma'auga, a maea ona taumafa o le ava a
Afamasaga ona maea ai loa lea o sa o le malae o Mauga.

NISI O MAVAEGA ILOGA A SAMOA

LEULUMOEGA.

Sa manuia iC tulai mai O Mtagutuila ma lana nofo, sa leai ni taua i Samoa i ia ona po, ua gasegase le alii ona fai ai lea o lana mavaega.

- “**Lutilufi** e, ma **Leulumoega**, o si o’u atalii o **Tupua** o le a outou feagai, a o si ou atalii o **Peputuleai** o le a tautua.
 - **Satuala** ma **Salevalasi** ia outou faafogaga lelei mai i la’u upu, o oe **Salevalasi** o le a tausi e **Lufilufi**, ao o’e **Satuala** o le a tausi e **Leulumoega**”.
 - “O **Salevalasi** o le **Aiga paia** lea, Ao **Satuala** o le **Aiga Faalagilagi** lea, ao lo oulua toga o le a igoa faatasi. O le a **Pulumaleleuleu** **Satuala**, **Pulumaleleuleu** **Salevalasi**.
 - A o **Aiono** o le a faaele’elea e tugā i le tausiga o lo’u atalii o **Tupua**,
ao le toeaina lea o **Taimalieutu** o le a alu i **Lupese’ē** e nofo ai, e **fofoga** ai **Satuala** aua upu o si ou atalii ona maea ai lea o tofiga a le tupu o **Muagututua**, ae tuua le malo, gasolo ao ma taape pāpā o le alii.

O LE SAESAEGA LAUFAI NAI TUMUA NA TALA LAFO AI ATUA.

Ona faapea lea o Lufilifi ma Leulumoega, o le tama nei ua tuuina mai tatou te feagai, se'i faasoaso a mai po'o fea n ona aiga. **O le tama lea o le Saesaegalaufai a Tumua, na tala lafo ai Atua.** E tua Mulinuū nei i Falenu'utupu, tatala le lafo o Manuō. E tua le Falenu'utupu i le Vainiu, tatala le lafo o Molio'o. E tua le Vainiu i Vaie'e, tatala le lafo o Juli. E tua Vaiee i le Iiili tatala le lafo o Moeono. E tua le Iiili Salani tatala le lafo o Ofioa. E tua Salani i Falefasa, tatala le lafo o Talo. E tua Falefasa i Faletoi, tatala le lafo o Fa'autania.

Ona faapea lea o Lufilifi ma Leulumoega. Ua lava o tatou toga, se o le **Tama'aiga le tama nei**. Ona maua ai le i le Tamaaiga o Tupua. Ona nofo ai lea o Tupua Fuiavaili i le nofoaiga e sui ia Muagututia, o ia o le Tamaaiga. Ua loto uma i ai Lufilifi, Leulumoega ma Tuisamau, Satunumafono ma le Alataua. Ona maua ai lea o le igoa o le Toga a le Aiga Sa Fenunuivao, o le toga o le **Fa'asoasoaga a Tumua.**

MAVAEGA I LE TAI: SAVEASULEO, ULUFANUASESEE MA SALEVAO

• O le a te'a Saveasuleo ia Pulotu i le atu sasa'e, e lologo ia te oe le malo.
• O le a usugafa Ulufanuasesee, e tupu ai le Alii o le Alataua,
• Ao Salevao o le a Fofoga o le Alataua
Ona usu gafa lea o Ulufanuasesee i le afafine o Tagaloatele i Pata fa'aee le gafa o Fa'ahuatele ma Aveautele, o alii na ua te'a i le Tuamasaga.

O Aveautetele o loo nofo nei i Alaoa, ae nofo Faaluatele i gauta o Vailele.

Ona toe usu lea o Ulufanuasesee i Fagaiofu fa'aee le gafa o Taema ma Tilafaga (tamaitai piihua) ona alu lea o le lausaga tau atu i le Motu sa e lei ite tagata, toe alu le ausaga tau atu i Manua e lei ite foi tagata, toe alu lea o le ausaga taunu i Falealupo. Ona usu ane loa lea o le alii o Moifelo ia Tilafaga, ona maua ai lea o le alii o le Alataua o Tuluitanu, o loo faalupe o alo o Tilafaga. Ao Taema na usu gafa i Tutuila.

MAVAEGA A LAULUNOFOVALEANE.

Sa faia le faatolotologa tama i le papa i le Vaisā i Tufu

Gataivai. Na ula ai Faatupuinati ma Tauaetali i le tama a Maupenei ona e ulu Lapoa. Ona fai lea o le mavaega a Laulunofovaleane i lana fanau:

- “O lau tama Tauaetali, o le a sasa’ a ese ona sua ia Lufilufi ma Leulumoega.
- Ao oe Faatupuinati, o lau tama o le a sasa’ a ese foi ona sua i Vaeolenofoafia.
- Ao le tama a Maupenei o loo lua tapisa ai nei o le a sasa’ a tonu ona sua ia Salemuliana”.

O le mavaega foi lenei e iai Aualuma e tolu o loo tauisi e Samoa.

1. Tapumanaia – Ua ia Leulumoega ma Toleafoa lea.
 2. Pesefearamaia – Ua i Vaeolenofoafia ma Lilomaiaava lea
 3. Leaumoana – O loo tauisi e Salemuliana o Leaumoana lea.
 4. O le poloaiga a Nafanua a manumalo le taua, ona ave lea o pāpā o le suafa ia Nafanua, ae nofo Tupai i Tuana i faatū le malo i le malae i Tanumafili. Ua tau le taua ma ua manumalo Fata ma Maulolo a ua toilalo Malietoa Sagaga ma Auimatagi. E ui lava la ua manumalo Tuisamau, ae ua ave ona mamalu e Nafanua.
- O le ala foi lea na faaigoa ai lenei vai o le Vai o Tausala. Na taunu lava saafiafiga a nei tamaitai.

MAVAEGA A MALIETOA UITUALAGILE TAMĀ O MALIETOA LA'AULI

Afai ae tuua le malo ma taape pāpā o le alii, ia avea igoa o lana fanau e fai ma sua fā mamalu.

1. Ia nofo Gatoaitele i Tuisamau ma avea lona aiga e fai ma ao o lena nuu, ma ua tuu atu lea ia **Fata** ma **Maulolo** la te faataunuina lana mavaega.
2. Ae peitai ua manao Malietoa Sagaga e faasaga mai Fata ma Maulolo ia te ia, aua o failauga taua ia o Tuisamau, ae tuu le Gatoaitele. Sa teena e Fata ma Maulolo ma o le amataga lea o maseiga na iu ai lava ina tauina le taua a Malie ma Afega.
3. Ona saili fesoasoani lea o Gatoaitele ia Tupai o loo i Leulumoega, ona tali mai lea o Tupai ua lelei, ae sei logo muamua Nafanua i Savaii. Na logo e Tupai Nafanua ona tali mai lea e o i na tau le taua, ae faatali mo aso e līma sei maea sauni Tonumaipaea. Ua foi mai loa Tupai ma logo Tuisamau.

VAEGA LUA OLE MAVAEGA A MALIETOA

UITUALAGI.

Ia avea suafa o fanau a lona atalii o Laauli e fai ma ao o

le Tuamasaga o Gatoaitele ma Gasoloaolelagi. Peitai o le teine o Gatoaitele e pa e le alo le tamaitai, ae toatolu le fanau a Gasoloaiaolelagi ia Sanalala.

O le teine mattua la na alagaina e lona tama ma le uso o lona tina o Gatoaitele ia fai ma ao ole Alataua. O le ao lea ua taua ole **TAMASOALII.**

Ona iai lea o PĀPĀ (AO) ua taua o PĀPĀ FAFINE.

(papa ia e fou)

1. Gatoaitele
2. Tamasoalii

PĀPĀ TANE (AO). (papa ua leva)

1. Tuiiana
2. Tuiatua

NUU E AOFIA I LE ALATAUA I SAFATA.

1. Mulivai
2. Tafitoala
3. Fausaga
4. Fusi

TAFA'IPO'O TU'ITU'I (PĀPĀ E FA O SAMOA)

E tofu lava papa e fa ma ona tafai.

1. Tuiiana – Pasese ma Umaga
2. Tuiatua – Tupai ma Tagiau
3. Gatoaitele – Fata ma Maulolo
4. Tamasoalii – Fuga ma Muaava

Afai e faae nei papa e fa i se tagata, ona taua loa lea o le **TAFAI FA**, o lona uiga o le pule lea ia Samoa atoa poo le tupu.

MAVAEGA A TUATUA POLAILEVAO.

“O le a Tuiatua Fotuitamai, ae Ao o Mavaega Loofie. Ae to le lua faaaloalo ia **Sefatauemana**, e faatauelele i ai ouluu mata”. O Tuiatua Fotuitamai lea na usu ia Teteatamatatal le afafine o Leifi faaee le gafa o Puepuemai ma Aliitasi.

Puepuemai lea na fai ma Ao o Mavaega.

MAVAEGA A TUIA'ANA I'AMAFANA IA MALIETOA VAINU'UPO

Na afio le tupu i Sapapalii e malolo i ai. Ona sao ai lea o le aumaga a le tupu, sao foi le aumaga a le Malietoa Fitisemanu ma ua latou fetaufaoa'i le tanoa mo le faiga o le alofi. Ua loto le aumaga a le tupu e tuu ia tei latou le tanoa, ona tupu ai lea o le misa i le va o le aumaga a l'amafana ma Malietoa. Ua tau lava le taua ma iu ai ina tulia i le sami i le aumaga a l'amafana, ona lagatū lea o le aumaga a Malietoa o le a fafasi i le sami i le aumaga a l'amafana. Ona oso atu loa lea o Malietoa ua faapea atu i lana aumaga, ò i uta aua le fasia le aumaga a le Tupu. Ona lava'i ai lea e Vainu'upo le aumaga a l'amafana, ua ia fafasi le aumaga a Malietoa, ua foafoa ma ua gaugau. Ona silasila atu lea o le tupu o l'amafana, e ese le loto alofa o Vainuupo ia te ia. Ona pau atu loa lea o lana

malelega ma ana agiagi. "Sole se matua e tautua lelei, a ou oti ona e nofo lea i le nofoaiga tou te feagai ma Lufilufi ma Leulumoega". O le uluai Malletoa lea na faae' e i ai pāpā o le Tui'a ana e tusa ma le mavaega a le tupu o Tui'a ana l'amafana.

VAEGA 4.

UA AVEA GALUMALEMANA LE ATALII O TUPUA MA TUI'A ANA.

Ua loto Leulumoega e fai Galumalemana ma tupu. Ona aami loa lea e Leulumoega le alii ma aumai i le maota i Nuuausala i le maota e afio ai le Tupu Tui'a ana. Ona avatu loa lea o nofoa e fa tāua o nofoa paia po'o nofoa sa. O le nofoa o Lemana, nofoa o **Galu**, nofoa o Solai ma le nofoa o **Manutā**, o inā na maua ai le igoa o le atalii o Galumalemana o **Nofoasāefā** na avea foi ma Tui'a ana. Tui'a ana Nofoasaefā lea na usu ia Tusoloimalae le alo o Mata'i a i Faleata ona i ai lea o **Leasiolagi**, ona toe usu lea ia Sauimalae le afafine o Tuimaleali'i ifano Tuitaalili o Falelatai ona i ai lea o **Taoalii** lea e faaupu, *ua gau teime lona titi*.

O Tuiiana Galumalemana lenei e ana le fanau ua tam nei o Aloalii .

TAOTO LIMA A GALUMALEMANA

1. Nofoasāefā
2. Tualualelei
3. Iamafana
4. Tupolesave
5. Tualamasala

NISI TOFIGA ILOGA A SAMOA

OTOFIGA A SANALALA MA GATOA'ITELĒ:

O Vaetamasoa o le a nofo i Safata e fai ma alii o le Alataua, ao Lalovimama o le a tuu lava faitalia o ia ma se mea e fia alu i ai. O Atonaugaaletuitogā faitalia foi o ia ma se mea e fia alu i ai.

USUGA TAUTAUAE TOLUOLE FANAUA SANALALA.

1. Lalovimama (tama) – Na usu Lalovimama ia Sefaaatauemana le afafine o Tuiatua Togiai fa'ae le gafa o Tuiatua Matautiafaatulou.
2. Vaetamasoa (teinei) – Na usuia Vaetamasoa e Selaginato le alo o Tagaloa Fa'aofonuu fa'ae le gafa o Tuiiana Tamaalelagi
3. Atonaugaaletuitogā (teine) – Na usuia Atonaugaaletuitogā (tama) – Na usuia Lafainatau i Palauli (suli o Nafanua) fa'ae le gafa o (1) Tauilifi na avea ma Tonumaipea (2) Tupai na filifilia e Nafanua e fai ma ana osittaulaga (3) Levalasi (na fai ma taupou a le Tuiiana Tama'alelagi lea na sua lona igoa ia So'oae malelagi

TOFIGA A MALIETOA TAULAPAPA SA FAIA I

SUFAITOTOA I FALEATA.

- To'omata o le a feagai ma Safune.
- Seiuli o le a feagai ma Tuamasaga (Faleata).
- Leuluaialii o le a feagai ma Salemuliana.
- A o oe Saleutogi o le a e tautua. O le a e ljamamatua i Faleupolu e fa

FALEUPOLUE FA O TOFIGA:

1. Faleata
2. Safune
3. Salemuliana
4. Saleutogi

TOFIGA A MALIETOA SAVEATAVAE'A SA FAIA I TULIMATALA:

Lealali – Sau oe e alu ma lou Tumua i Aana ma lou Ituai ma lou Alataua. O Malaeloa ma Malaolevavau e te nofo ai i Leulumoega.

O le Ituai ua ia Pini ma Vaisau, Laufiso ma Tapuala O le Alataua ua ia Sagafili ma Samatau.

FALEONO O LEATIGAGA:

1. Usu Gaga-Savea ia Pate le alo o Alainuanua f.g.

Fata – Alu ia oe ma lou Alataua ma lou Ituai e atoa i ai Safata

Viatauia – Alu ia ma lou Ituai ma lou Alataua, lea na i Saleupolu na fā'atū i le Papa i Galagala.

6. Saveatama (Siunu)

Savea – O lou lenei Tumua o le a ia Tuisamau. O Tuisamau o le a Faletete ae Faleo'o Faleata, ao imoa o le faleoo e gase i le Faletele. O le a faleoo i ai le faigamalo. O Tuisamau o lau Moafagatau o le Tinifu o le vai o Atoga ma Samalacti'a.

Ona toai ane ioa lea o Paepule ma Sugalinevave o le fānau a Leifi Suemalo i Tulimatala i le mea o loo sūstū ai le Malietoa: Ona fai atu lea o Malietoa, Omaia ina o ma lo oulu Tumua. O le Tumua lea sa ia Lufilufi ma le vaega o Falealili. Na wavae foi i ai ma le eleele.

Tuna – O le a e pule e alu atu i uta i le Mulivai o Aele e oo i le pa i Asusu i Saoluafata.

Lealali- E pule amata atu i Utualii e oo i Vaimatafia.

Fata – E pule amata mai i Ulu'ulufau e oo i Vaimatafia (Savaia Lefaga)

Malietoa Savea – E amata atu i uta o Mulivai o Aele e o'o i Utualii.

1. Seupule (Faleula)
2. Taogogo (Faleula)
3. Niualii (Faleula)
4. Pouliuligaga (Saleimoa)
5. Fuataogogo (Vaimauga)
6. Saveatama (Siunu)

2. LEITU TOLU OSAGAGA:

1. Leupolu Savea (Saleupolu Vaimauga)
2. Umu Savea
3. Gaga Save

TOFIGA A LEALALI SA FAIA ILANA

FANAU O SAUSI MA SALEVAOGOGO MA

TUPAIMATUNA MA ONA USO.

Usuga a Lealali:

Na usu Lealai ia Fotusili le afafine o Leutele i Falefa faae'e
le gafa o Sausi ma Salevaogogo.

Toe usu ia Malegaletoelau le afafine o Tuisafua i Iva
faae'e le gafa o Tupaimatuna, Tupairelei ma Tupaisiva.

O Sausi ma Salevaogogo o le a nonofo i Aana i
Leulumoega, e i ai le Aiga Sausi ma le Aiga Salevaogogo
Ao Tupa'imatuna ma ona uso o le a o i Savaii e alitai i ai
Salafai.

Tupaimatuna lea na usu i le afafine o le Tuitoga o
Laufafaotoga ona i ai lea o lana fanau o Va'asilifiti ma
Fotuosamo

TALA PUPU'U

E SA'O AE LE A'O

O le osaosa o le oa o le poto salalau faa-nei ona po, ma le fafati mai faa-taifana'e o suiga, ua vaemantu ma manunu ai toau o ufi i le aganuu mamalu a Samoa. O le oa o le gagana a Samoa, o lona igagato lea ma lona tofi mai le Atua, o ana measina e faamemelo i ai ona tagatantu e fai ma manulauti e apelepelea le olaga tautua ma le ola galue o le tagata i totonu o lona aiga, nuu ma lana Eklesia. Le aganuu ma ona upu e fai ma paepae lei e mafolafola ai ma nanamu lelei mea ua taetaepalaloa. Aua a malu i fale e malu foi i fafo. Afai foi e logo lelei i le faalogo e magoto malie foi i le loto, ona olioili lea o le livaliva aua ua tu tonu le vaga i le figota. O le tuiveevee ma le tinumasasalsala e faamaneenee ai le manaia i ana evaga faa-tama, ao le tuiga tu faa-mauga tula o le augafaapae, e faa-maliulu ai ma solialofi i ona malae tauis.

E usu seu le tautua i ona nafa ma faiva alofilima o le uta ma le tai. E sua le aulapa uta e sua foi le aulapa tai, e asa le gasū o le taeao agai i le tuasivi aua se fiauli ao se otomalesau e talialo ai le tapuaiga a le matai. E sosofo le gatafale ina ia mata i'a sā le tiuga aua le taliuta ma le tau laulu. A tautai a'e, e faasoa lona faiva i le tuafoe ia faasopolia le tapuaiga a matua tauis ma aiga, ao feoi foi o le Talalelei a le Atua, faapea lana fanau ma si ona toatua. E tautua mata vela, o lona uiga e tali lelei ma le loto faafetai le sua a le matai ma ia inu malie i lima o le tautua. A laulelei le tautega ma tutu i nui manaia lona sa, ona to lea o manū faaifo mai lagi mo le tautua, ina ia faaosofia moegaluaga o faamanuaga e faaaauai ai le sivaloa a le tama

tane malosi ma ia aua ai nei se'e lili'a ona faiva, ae ia avea ma ti'a e lele malie.

O le malofie o le laeimau o le tana tane e fai ma ona mitamitaga e iloa gofie ai i soo se saofaiga po'o ni faafifiaga. E le soona pipi fia le malofie i le pa'u o le tane, aua e iai foi tua o patatua. Ia poto lona fofoga e tautala i le gagana e faatino ai lana tautua tuavae, ia manino lelei i ona nafa i totonu o le maota o matai i le anofale ma le taufafo, ma ia malamalamā i ana agatausili aemaise o lona faasinomaga. A fāasaniti le laei o le sogaimiti i le aai poo le fale o matai, ua sala lava ina fai, aua ua matua agavaa lelei i ai, ua onomea foi e saasaa i lumā o tagata pau lava o se taga nei sala. Ae a fāasaniti le laei o le pula ū ua le talafeagai, ma o le a tele foi upu ma tala a le atunuu e fai, e fa'aatuatuē malu a tamaitai Samoa, e i ai foi ona faalupega ma ona faalaniga mamalu e agavaa i ai. E mamalu ma lalelei pe a se'e mai i le tanoa i le alofi o matai. Ae a mo'emo'e mai loa le augafaapae e saasaa i le malae, ia ua muliga foi ni oli ao ni foli, aua ua nao le faamatamata ita mai i ai o le aiuli a le sogaimiti ua tau le mafai ona vaovao lona fia aiuli u'ae faigata ua taoto le aulape.

O lea ua i fale le mattega ma ua ōia le vao i Fagalele, aua ua masofa le fa ma ua tafefea pulu i le vai. Ua malili le poto moto, ma ua sola nei le fai ae tuu lona foto. Ua tele le poto ua tupu malaulau ai foi ma le tele o tu ma aga le talafeagai ua luuluagia ma ua pisipisia ai le aganuu mamalu a Samoa, ma ua see mamao ese atu ai nei faa-ia-vai. O lenei tupulaga o le talutulu fou ma le Iaumea toentuti ua matua vaovaoga lo latou ma'ema'e ma le tausili i mea e le gafatia e lo latou malosi. Ua faia faataloga i vai le mammalu o le aganuu a Samoa, ma ua latou leiloa foi le mea e tosi ai le tuaoi. O le gagana suifefiloi ua aniga i talaga a le matagi, ma ua avea

faamea taitai i le ala e fafao i le ato pīpū solo. Ua taaviliga mafaufau ma loto o tupulaga i luga o upega tafailagi ma ua lavelavea solo ai faa ia o tai nefu. Ua faigata ai ona latou lagonaina le leo o le foafoa o le fono usu, ma taimi e ula ai afi o le afiafi ae sei fana afi o le faamalama.

E sa'o ae le a'o. E poto foi ae leai se faautauta. E manatu lava le tagata ua poto i lona lava loto, ae atagia i ana amio ma uiga vaia lona gaogao ii ma le leai o se faautaga loloto. A tautala mai ua leilca poo se Samoa poo se a? Aua e amata i le H ae faain i le F. Ua sa'o ai le pese a Asuao Felise Mikaele. "A fāasamoatua faasamoatua mai". O le poto moto o nei ona po e sa'o ae le a'o. E foliga i se laau e tu faasasao ma foliga lelei i le vaai pei se pouut o se afolau, ae a pau i le eelele e gaulua ma le aoga. E logo lelei lava le tuualalo a nai toeaina ma nai lo'omamatutua ua lagomau mai itiassa, e ui lava e le masau si ana faatolotolo, ae a tautonu ematua gaulua ai lava le olo. Maimau pe ana mafai ona faalogo le tupulaga fou i fagogo a si loomatua sa faafoaleina ma foafaina olaga o fanau o aso ua mavae, o se auala sa mafai ona faapotopoto faatasi ai le fanau i taftafafa o le tina, faapei o le matuamoa ona ia ofaofata'i i lana fanau i lalo o ona apaau. O le tau tonu o le fagogo i le loto ua pei lava o le māape a nuu potopoto. Ae o se faiaga sii lea o le mafaufau na te taofiofi mamau. Aua e pala le maa, ae ola pea a latou faamatalaga ma le tuualalo faamatafafitama.

Ae ana sei mafai foi ona toe vaai le tupulaga fou i si ona molii matagi tau pulapula sa taulaga ai le fanau i le po, ma si ona tainamu tau afeafe, sa faafoalele ai augatupulaga ua mavae. Atonu o le a toe totogo ane ai ni moemoe fou o latou olaga. E fasaga lana tama i lana mama fa'i tunupa'u i le malala, e laina mai lava i luga o lona vae matua e oo i le tulivae, ao loo afisi lana tama i lona fatafata, ae o lena mama e momoli mai faatasi ma le mana. Le mana lea e fai ma ona taiala, e iloa lelei ai e le tama lona aiga ma lona

fasinomaga. Le manuia lea o le tupulaga o loo taoto i maotaga, sei toe uluulumatafolau ma toe lalaga pei o faiva o fāfine toaga. Aua nei muta le tata pea o le logo a Masefau, aua foi nei mavae le tuumumusu ma le tuualalo tai ma aliali uma mai ai maa o le aau, ona tatou lagonaina lea o le iuleo o le seleselega ua faapea mai. Sāo ua malie faatolotologa tama, palē ua ta pale, ūla e, ua ta ula. Faafetai matua.

E moni lava e i ai itu e sa'o ai mea o loo faatiga taliga mai ai tupulaga fou o nei aso, peitai, E SA'O AE LE A'O.

Tusia Faumuinā Manu Samuelu.

“UA TAGITAUTALA LE MATIVA”

(Tala na faavae mai i le manatu o se tasi o tama i luga o le

Observer 2016, faaululatalaina “Ua mativa Samoa”)

Ua tagi talatala le toeaina mai tuā fai mai ua mativa Samoa. Fai mai ua fai mea so'o le lotu, ma ua ai uma e le lotu tipe a tagata, ua mamafa tu foi le aganuu ua le maua ai se manuia o aiga. Ua fia aai le fanau ma ua le lava le faaso a ave ai i le aoga, aemaise o le faatinoina o manaoga o aso una. Ona sa'i loa lea o le tamaloa fai mai ua mativa Samoa. O le leo lea ua lagonaina i le taimi nei i luga o televise ma leitio, ma ua vaia foi i luga o musipeda ma upega tafafilagi. **Ua mativa Samoa.** Ao le fesili, pe moni ua mativa Samoa?

O a'u o le tama tane Samoa au'ulili, na fanauina e ni matua Samoa i totolu o se nuu mamao ese ma le taulaga o Apia i le tausaga 1962. Sa amata mai i nai moli fagu faasolo mai ai i molii tu e utu i le kalasini, e solo māmā lona malamalama ma le fā'ae tete ina nei ta'e ona tau pulapula lea o lona mūmū. Sosoo mai ai ma nai moli penisini e telē attu lona malamalama i totolu le fāle uma, ae le maua foi e aiga uma, se ia vagana le matai sa'o ma le faifeau ma se tagata ua mafai e lona malosi ona faatau. O se olaga tagofie ae toe taugofie.

OLE OLAGA FA'ALE AIGA

O fagusea o le faiva a lou tina, ma nai ana tau popo sa māua ai tupe na fa'aao'oga uma ai matou. O le tele o taimi ina ua oo lau aoga i le Itumalo, sa mafai ai ona ou fesoasoani e faatau savali fagu sea a lo'u tina i le matou nuu, ma nuu tuaoi e su'e mai ai se seleni mo manaoga o le aiga. E moe si ou tama i uta i lona maumaga faatoa sau lava i tai i le Aso Toonai, a uma le Aso Sa ona toe alu foi lea o lana moe. Ao si faatoaga lea a si toeaina sa faamoemoe i ai lo matou aiga i soo se mea fai, e le gata i le Lotu ao mea fai

foi a le nuu aemaise o le tausiga o le aiga i aso uma. O se olaga e faigata i le vaii ae aoga. O le olaga tauivi faatasina i tiga o se olaga suamalie. Ae e ui i ia natura o le soifuga na ola ma soifua mai ai i na aso, e lei mafai ona lagonaina lea ituaiga leo ua mativa. Ae sa inu malie lava ma taumafai pea ina ia i ai se aso e fanau mai ai manuia o le ola tauivi faatasina ma tiga. E o gatasina lelei ma le aaoaoga a le Tusi Paia. A le galue e le ai, ia ave foi le taui i le tagata e tusa ma lana galuega.

OLE MAFUA'AGA OLE LĒ TAGOLIMA

Ua ola faalogologo tiga le toatele o tagata ma ua mananao i le mea e maua ma le filemu. Ua le toe fia ola i le siosiomaga o le olaga faasamoia moni, ona ua saoasaoa le fafai mai faatafanae o swiga fou mai fafo. Ae atai foi ua sa'i ma tagi sa le toeaina mai tuā, e leai foi se tasi e faitio, le mativa o le tagata ona ua vale tulima ona faiva alofilima mai le amataga. Afai sa augata e alu i le aoga, ma ia le talia tiga o le ola aoaoina, e iu leaga foi lona taununga, aua o le olaga moni o le Samoa e tagi lava i lima ma galue i le uta ma le tai mo le manuia o aiga.

Pe afai ou te toe to manatu ma toe autalu lagona ma mafauau o tagata ua fa'aalia i le mativa o Samoa. Ona ou faapea atu lea e le mativa Samoa. E moni ua saoasaoa le suiga o le olaga ma ua alu i luma le soifiaga ma foliga mai ai ua taugata le olaga, ae faatumauina pe'a le tamaoaiga o le lotorifale ma punaoa o eelele ma laufanua o Samoa. E nofo fua le tagata i lona lava fanua e leai se totogi, e oa ma tamaoaiga ona lauelele i fua o fa'aeeleleaga e tua iai le fia fiafalaau aina e talialo ai i so'o se taimi. Sa ou maitauina mai le amataga, e tofu le aiga ma le maumaga ma nai a latou mea fafaga e tua i ai i soo se taimi o le soifiaga. E mafai ona toto nai fuaalauina i tafatata ane

o latou maota ma laoa, pe toto foi nai fa'i i tafatafa ane o le tunoa e tua i ai le aiga. E tamaoaiga le lauelele i taumafa. E leai se fia ai, e lei lagona ina foi lea ituaiga leo ua mativa, aua foi sa galulue faatas i tagata uma, o matua faatas i ma a latou fanau, e tagi lava i lima. A o'o i le taimi o le tu'uaga o aoga, o taimi ia e o faatas i ai tupulaga tama ma teine o le aiga e fesoasoami i atina'e ma faatoaga a nai matua. E le o mafai ona toe tupu lea tulaga i tupulaga o nei aso, ae le mafai ona avea lea ma alofaga ma mafuaaga o se mativa ma le le tagolima, e pei ona tagi sa ai le toatele ma faapea mai, ua tele le mativa.

O LE OLAGA O LE SAMOA.

O le olaga o Samoa e tagi lava i lima sa le faamoemoe i ni fesoasoami mai fafo poo o latou au aiga, ae galue malosi ma finau le tagata mo lona lumana i ma le manua o lona aiga ma lana fanau, aua foi e sili lava ona suamalie mea e maua mai ou lava lima. E te inu malie ma maona i fua o lou afu sisina. O mai afolau sa fai ma fale tele e nofo ai le matai po'o le sa'o o le au aiga, ae tua le fale tele i le faleo'o o loo nonofo ai le au tautua. A tupu tele le aiga, ona toe fausia foi lea o nisi fale e nonofo ai ma tautua le matai. Ae le mafai ona faaigoaina lea tulaga maulalo o le mativa. E le fuaina le mativa i le fale e nofo ai po'o meai e maua i aso uma. Pe nofo lava i le faleo'o ae tausami na'o le faalifua fa'i ma le ipu ti, e fiafia lava ma ola manua le Samoa auuiuli. E le o le fale e taua i le manatu o Samoa ao le anofale. Peitai ua avea suiga faa nei ona po ua fai ma ala o le tagi ua puaina i le ala. A leai se fale papalagi ona faapea lea ua mativa, a leai se pura aisa ma se TV ona sa'i foi lea fai mai ua mativa. A vaai atu ua manaia le taavale fou a le aiga tuao ona faapea foi lea o tatou ua matitiva. E le o le laulau mai nao le saka ma se suā ti e aunoa ma se vae moa poo se fasimamoe e ina'i ai, ona faapea lea ua tatou matitiva.

E ala ona faapea le tagata ua mativa, ona ua malosi lona tausili i le mea e le oo i ai lona malosi, ma tagi sa i mea faigata e le tutusa ma le olaga o loo soifua ai. Afai lava ma'o le faalifua ma le eleni ete gafatia, tausami ffafia, ae aua le momoo ma asamo fua lagona i mea taugata ua maua e tagata sa talitiga matua latou gafatia. O le afiga a le Atua o loo faapea mai, ia grata o tatou manao i mea ua tatou maua. O a mea ua tatou maua faoga ma ia galueaina e o tatou lima e tua i ai le aiga. Afai foi o le lotu ua fai ma fa'apria mata i totolu o aiga ua avea ma ala o le mativa. O loo i le tagata lava le lotu fuaatiafo e lelei e fuaafua ai le mea e tatou ona faamuamua, ma le mea e faataatia i se isi taimi.

A faitau manino ma malamalamia i le Afioaga Paia a le Atua, e leai ma se mea o le a avea ai fua le lotu ma alofaga o le mativa. O le mafuaaga o le mativa o loo i le tagata, a le galue ua le ai, a leai se galuega e fai a le maua foi sona tau.

Aisea e te manao ai fua i sau TV, pe afai e te le maua se tupe e faatau mai ai ma totogi ai le eletise. Ia fua lou manao i mea ua e maua. E te mana'o ia maua sau pura aisa ma sau masini tamea, ae a leai se tupe e totogi ai le eletise ona motusia loa lea e le Malosiaga o lana auaunaga. Ona oso sasa'e loa lea i luga ma faapea ua mativa ma ua taugata le soifiaga, ae o le mafua'aga ua tatou fia ola fua i le olaga taugata tatou te le gafatia. O le ala lena o le mativa, ona ua tagi fua i le mea e te le mafua ona ua malosi le ola faatusatusa i isi tagata. Fai mai le poto o Solomona, E sili o si mea magumagu e maua ma le filemu nai lo le moe ae oi i aitalafu.

O LE AGANUUMAMALU A SAMOA E LE SUIA.

O le aganuu mamalu a Samoa, o le mea sina e tatau ona puipui malu. E tatau lava ona fatino le aganuu aua o lo tatou igagato ma lo tatou faasinomaga lea mai le Atua. E fai o tatou fa'alavelave fa'asamoa i aso uma, e fai le maliu, e

fai le umusaga ma le faaulufalega, e fai le faaipoipoga, e fai
foi le saofai. O mea uma ia e tatau ona fai, ao lona
faatinoina ia fai a i se ala talafeagai e tusa ma le tamaoiga
ma le malosi o le aiga o loo i ai. O le māmā ma le mamafa
o le faatinoga e paū lea i le matai o loo tausia le aiga. La fai
mea uma i le alofā. Aua nei avea faalavelave faasamoaa ma
ala e su'e ai se tamaoiga o le mattai ae mativa masaesae ai
lona au aiga. Aua foi nei fai a o se auala e sue ai se viiga o
se tagata malosi ae matua lailai ai le tagata vaivai. O nai
vaiju ia ua manunu ai le toau o ufi, ma amata ona masofa
ai le fa i totou o faiga nuu ma aiga ona ua tagi mai le
tagata vaivai ua tele le mativa.

UAMATIVA TAGATA ONAOLE IOTU.

Afai la ua tagi tautala le mativa ma faaseā i le lotu. E tatau
foi ona toe silasila mamao ma fetu'utu'uina'i le tofa a taitai
o le lotu poo gafea tonu le waega e mafua ai ona faiito
tagata ma tuaina le lotu, o le mafuaaga lea o le mativa.
Afai e moni ua tele tupe e alu i le lotu nai lo le tausiga o
aiga. E tatau ona toe to manatu taitai o le lotu, pe fāamata o
le finagalo moni lea o le Atua mo ona tagata. Ao fea tonu e
tosi ai le tuaoi o le ola foa'i mo le lotu. E tatau foi ona
malamalamalama le tagata lotu poo le a le uiga moni, o lana
foai, o lana taulaga ma lana tautua i le Atua. Ao le a foi le
uiga o le sefulua'i, ma le peleti o loo fai?

O a mea e ave i le Atua, ao a mea e ave mo le faifeau, ao a
mea e tatau ona ave mo le lotu? La malamalamalama lelei le
tagata, poo ai tonu le mafuaaga o le mativa, poo le Atua,
poo le faifeau, poo le lotu, ia poo le tagata lotu? O le fesili
lena e tatau ona saili lona tali, afai e maua le tali ona saili
loa lea o sona fōfō. Aua o le mea moni e le uma le olaga
tautu'ua'i o le tagata, e pei lava ona tupu foi i Etena. E
fesili atu le Atua ia Attamu ae fai mai o Eva, e fesili atu ia

Eva ae tu'ua'i i le gata ma o loo fa'aauau pea e oo mai i le
asō

OLE FINAGALO OLE ATUA IA OLA MANUA LE TAGATA.

O le finagalo o le Atua ia ola fiafia, ola maloloina ma ia
ola manuita le tagata o le pale alii o ana galuega. E le
finagalo le Atua e ola mativa le tagata aua o la o le Atua o
tamaoiga. O le faamoemoe lena o le Atua na faataunuina
ia Isaraelu ina ia latou maua Kanana. Ina ia latou aai i mea
ai lelei, ia momoe i moega lelei ma nonofo i fale lelei. Ma
meli, o le nuu o karite ma saito lelei, o le nuu o rimoni ma
mati ma olive, o le nuu fai mai o le nuu e uamea ona maa.
O le faamoemoe maualuga o le Atua ia manuia le tagata.
Na oo i le nuu o manuia peitai na faamativaina le tagata ona
fatu i ai, ua tuwina mai e le Atua ana faamanuiaga ia tei
tatou, ae tatau ona tatou galueaina ina ia tupu tele ai le
manuia i o tatou lima. E tatau foi ona tatou manatuina, o
tatou o auauana tauasi mea a le Atua, o mea uma o le
foaoaga, tatou te tausia lelei ma faogaina tatau, ae fua la i
le lelei ona faatonutonu o le mafauau. Ma ia aua nei galo i
le tagata o le upu a le Atua na fai ia Attamu, e te ai au mea
ai ma le afu, o lona uiga e galue ma ia afu lona muaulu i le
gagauina o le vao.
E le maua ma le filemu, e tatau lava ona galue.
Ae e le tatau foi ona pito tasi le silasila a le tagata lotu i
vaiavaiga o le lotu, ae e tatau foi ona faatinano lana mafafaoi
faa auauana tauasi mea a le Atua i totou o lona aiga mo le
manuia lautele. Ma ia silasila totot'a i le paleni o mea uma o
le olaga e le gata o le aiga o le nuu ma le ekalesia, ina ia
mafai ona tuituitia ai le mamafa o le avega o loo tauaveina i
totou o aiga ua avea ma ala o le matitiva.

NAIMOTUGA'AFA

O le manatu o le tamaititi Samoa au'uliuli mai Aana, afai e
lelei ona fuafua ma faata'atia le ata o le aiga e savavali ai i
aso uma, e manuia foi le taunuuga. Pe tatou te nonofo i fale

afolau ma fale o'o, tatou te manuia lava pe afai e lelei ona tatou faasoasoaina le olaga. E manuia le Samoa i ona lava lima, i ana faatoaga, o faiva o le gatai fale, o lafu manu poo ni nai pisinisi laiti e atinae ai aiga. Afai foi ua mauaina e le tagata le avanoa e aoga ai, ia faia faalelei ma tuu uma i ai lona loto ma lona mafau. Aua nei gata i aoga maualalo, a ia agai pea i luga i aoga maualuluga seja oo lava i le hunesite o le tumutumu lea o le ola aaoaina. A faapaleina le tagata sa lulu ma ona loimata i le falaoga, na te seleselé mai ma le fiafia faamanuiaiga. O le a leai se leo e toe lagona o le mativa po'o le taugata o le sofiuaga, aua o lea ua inu malie i fua o ana galuega. E oona ma tiga le olaga aaoaina i le vaai faatamaititi aoga, ae suamalie ma tofo lelei ona fua pe a oo i le taimi o le seleselé.

O le Atua o Apere'amo, Isaako ma Iakopo, o le Atua o Israaelu o le Atua foi lea o Samoa, O leova Irae na te aumai. O mea ua aumaia e le Atua i o tatou lima i aso taitasi, o lana faaso lea ua lava ma totoe mo le aso. O le ala foi lea o le upu a le Poto, "Ia gata lo tatou manao i mea ua tatou maua". Aua o lo tatou mana'ona'o i mea e le oo'i ai lo tatou malosi o le a avea lea ma avega mamafa o aso uma ma faatupuina ai pea le mativa. A tupu tele le manao ona atili ai lea o lo tatou ola aitalafu ma avea ai tatou mapologa a isi tagata. Talia ma le faafetai mea ua tatou mauai aso taitasi, ma tatou galulue pea ma faamoemoe i le alofa tunoa o le Atua na te fa'aatoatoaina lo tatou vaivai. Fai mai le isi muagagana. "Fai le mea e gata ai lou mafai, ae tuu i le Atua mea e te le mafai". O le tala a le Apostolo o Iakopo, O le faatutuua galue, e o faatasi ma a tatou galuega. E leai se mativa pe afai tatou te galulue faatasi ma lo tatou faatuatua II le Atua Sofiu.

A o le manuiauti o lea lava faamoeoe o le una'i malosi lea e matua o fanau i aoga. Ia onosai e tali tiga ma le taugata o le ola aoaoina auu a oo ina fua mai e suamalie lona taunuuga.

O le lūlū ma loimata latou te seleselé mai ma le alaga fiafia. La onosai e totogi le tau o aoga ina ia manuia ma maua ni faailoga maualuluga e oo atu ai i galuega lelei e fa'atamaoaigaina ai le aiga. O fa'aputuaga oa o le aiga o loo faauina ma le manuia. E le toe i ai se leo e toe lagonaina ua mataiva, ae na o loimata o le fiafia ma le loto faafetai i le Atua ina ua faaifo manū mai lagi.

Ona tatou mautinoa lea e le mativa Samoa, aua o le atunuua faamanuiaina.

Tusia: Faumuinā Semau Muliatalo Manu Samuelu

O SOLO**SATIA I LE ALA.**

O ai ea lenei ua na solivale maia le tupua ma le laoai,
ua tapisa solo i le ala o lo'o tofa le matai,

Ae po'o ai ea sona tupuaga ma sona faasinomaga,
Sei toe momoli atu i ai e toe faafaille lelei lona olaga,

A fai foi ua valetuulima se tu'ualalo a ona tuaa,
Ae o moegaluega foi o le Talalelei sei fotu ni manatu

Ae na ona sinasina o le lauao ao le tofa a le vaipapa'u.

E! Talofa e, i le Alosina,
O le fegaiga tausi a Aiga ma latou tama,

A'o lenei ua satia i le ala,

Le ma'atui ma le ma'agao,

ua so'ona folavale i le ala ua fai ma faalavea aao,

ao fea ea o i ai Laauli ma le aumaga,

sei laveai mai i ona mafatiaga,

Ai o lagona ia o Leafaitulagi i lona tagi mai i le ala,
Vaopunimamatagi ta fia laveai i ou tiga, ae pipii tia ae mamao

ala,

Leitioa foi Rasela a tagi aue ona o si ana tama,
O le mafatiaga foi lea na oo ia Tavita ona o Ionatana.

Talofa i lata lupe sa fa'aatele,
ua le tu tula, le tu i lota lima aae tu eleele

Talofa ua folo vale fala o Oli,
ao lenei semanu e nofofale le oti,

Le nuu sa faatali i lagi le galala o le fia taumafa,
ae paga lea e humafale i moana ae tua i le papa,

Ao ai se toa e faamaoni lona alofa,
sei tali atu i lenei fasifasi fa'amo'amo'a,

Maimau e, pe ana ou i ai,
sei ou laveai i lou tagi mai,
Le feagaiga o le mea uliuli i lo'u mata,

Ae ui i lea o oe o le toa manumanu o le Talalelei,
Ai o le mea lea na avea ai oe ma masiofo ona o aso
faapenei.

Tusia: Faumuina Semau Multitalo Manu Niulevaea

Samuelu.

SA'AFIAFIGA MO LE TOALUA PELEINA

APOUA MANU SAMUELU: (SOLO)

(Maliu 15 Aukuso 2010)

E! le tauafafi o Aana ua faapouliuligia ina ua gasetoto le

la,

Ua ifo toele foi laau o le vao sa punimatagi i aso afā

Ua le toe gagana pesega a manulele i le segisegi o le taeao

Ua le fēpulafi foi fetu o le masina fa alao

Ao fea ea le sau sa masani ona usu po mai le vaveao

Sei mafatotoga ai le maota tulutulu i tao

E! Talofa e i lata lupe faapelepele ua lele

Ua le tu i lota lima, ua le tu i lona tula a ua ifo i le eleele

Le fetu sa e emoemo i le tumutumu mauga e apelepelea e

ao o le lagī

Ua goto ifo i le moana o loimata liloifia i le tagī

La'u mama auro sa fai ma manulauti o lo'u olaga

Ua nutilili i le ala, e le toe foi mai lava

Ua logo mai le tala ua fatitoto le gataifale o Aana

Aua ua tu'umalo le masiofo a le Tūia'a ana

Le sa tausi alii i le Faumuina e ana le Tupufia

Ao se fa'apolopolo mo le Atua i lana Ekalesia

O oe o le toa manumamu o le Talailei a le Atua

Emaua'a lou fāatuattua, ao le alofa lava e te fa'amuamua

Ua tagi ai nei le fatu ma ua mativa foi le agaga

Ua sola le atamai, lofutuina i tiga ma ua ogē le gagana

Ua segia lo ta māuli ma ua gaogaoi o ta manatu

Vaivai ai le tino ma tau nofo atu ai ma lo'u fatu

Ao ai ea na te lāvātia le matuitui tiga o le otī

Pe na o Jesu na augani i lona Tama ia toe faafō'i

Si o'u tofi ma lo'u tauri na aumai e le Atua

Na ou tauto ai ma tautino, e avea oe Apoua ma o'u toalua

Le mativa po'o le mauoa, Le ma'i po'o le malosi
E le fā'ateteaeseina e se tasi se ia vagana le oti
O le alofa e fusia ai taua e faavavau
Ae maimau e, le mafataga ua na o se tama fanau le au

Ua poia oe faamanu i ofaga e ma'i tiga o lenei olaga

Talofa e, Apoua ua le mafai ona ou laveai mai ia te oe i ou
tofaga

Sa ou taumafai i le mea sili e gata mai ai e laveai ia te oe

Peitai ua to le tali mai le lagī, a'e malo ou faiva ae sulu lau
foe

E ui e faigata ma tiga le tali mai le Atua

Ae o lo'o fa'atali mai le lagī o le taunuuga lea o taua

O le avā amio lelei e silī lona tau i penina

O lou alofa, lou lālēi ma au aga tausa'afia

E ola pea i le loto au galuega sa fai ma le fiafia

Ole mafuaaga lea na manua ai lo ta aiga

Aua e tiga lava le mau faigata e o'o mai, e te nafa
taulimaina

O oe o le Matuaofaiva i le Papa i Galagala

E tua ia te oe alo ma fānau a Samoa i lau fā'atufugaga

Ua malie toa ua malo tau Apoua

Ua e tau le taua lelei, ua iu ia te oe le tausinioaga

Ua alalaga leotetele mai fua manua o au galuega

Aua sa e fa'asoia i le tuafoe i'a o lou faiva

Apoua le manamea, amua oe ua e tea atu ma faigata

Ae leiloa mai le mea nei e moe i loimata, ae ala i tiga

O ou foliga lālēi e tumau pea i lo'u mafaufau

E atagia mai ai foliga vaia o si a ta fānau

O lo ta tofi ma lo ta taui mai le Atua

0 ni tamai olive i le laoai, o faamanuiaiga mo i tau

O manaoga faivavale ma mo'ono'oga fa'alupe o eleele naumati

Ae faigata ua fāalava le amoā ua paū le malelega mai le Lagi

E aumā foi lenei olaga ma ona manaoga

I manuia ua tapenaina e Lesu le alii Faaola

Alu ia oe Apoua la'u manamea i le ala o le lalolagi uma

Ae sei taumafai pea le sēuga ma le fanau, ma tālia lupe o pupula.

Faafetai mo lou ola ma au taleni sa fā'aogaina mo le Atua

Ua fai lea ma ona viiga ao se lu'itau foi mo la'u tautua

Qu te fā'afetai foi mo matua na la fanauna oe i le lalolagi

Ua faamamutaina ai a'u e ui ua tu'uua toatasi

O le tatou savaliga e tau i le ola e faavavau

Ae sei taumafai pea se gapiā o le ta fanau

Afai ou te tagi ua sala ina ou tagi

Afai foi ou te sa'i ma ou matanana, ua sala lava ia Vala

A fā'apefear e lei tele ni tausaga o le mafutaga

O le ala lea o lo ta tagi leo tele i le ala

Sei māsua atu i fafo o ta tiga ma o ta mafatiaga

Sei tu'umamainai ai lenei avega ua matua mamafa

E lei fanauina i taua i se manava e tasi
E pei o le ala o mea uma i le lalolagi
Ao le Alii Faaola,
na ia tausia o ta loto ma lagona
O a lava faafitauli o le ola e o'o mai
E affinai i le alofa moni o le Matai

O le uo e sili nai lo le uso
E sili atu lona mangi nai lo le muro
Faafetai i le agaga o le alofa
Ua saili ai le tofa poto mo le ala i le Ola
Ua tu'ufaatasi o ta tauau e tauao ai le avega
Nei mapuna se tua po'o se vae nei mapeva

E tutupu matagi i liu i le mālu mai o fisaga

Ao ta talanoa ma fa'aso i le Fa'aolataga

O manatu o tama valevale e fetogia'i fā'aso i tuoai

Ao nisi foi taimi ua fetosoa'i fā'apa'utolo a loi

AE a'e manuia lava faiva,

Ina ua atoa ia i liu ma ua tau le ai o lapega

O lenei ua se'e lilia le sa o Tuimanu'a Mamana

Ae lafiofa pea attaata o Taulelei i le matafaga

Tepa a'e i le lagi ma to manatu,

Pe o le a seu i fanua pe fa'a se'e' e tuāgalu

I lo'u va'ava'ai atu i le tama o lo'o tagitagi mai

Ao a'u ea ua ou agaleaga, pe ua galo le alofa o Sinamaitai

O le lagi o le taunu'uga o mea uma

E fa'apea foi le mafutaga a uso e fa'avavau lona iuga

Ia maua pea le loto alofa moni fa'aleuō

E fa'ataumu'u ai a ta miti sa faufau i tulivae i vaeluaga o po

O le Atua o manuia sa amata mea i le mafutaga

OLE UÔ E SILI ATUNA I LO LE USO.

E lei fanauina i taua i se manava e tasi
E pei o le ala o mea uma i le lalolagi

Ao le Alii Faaola,

na ia tausia o ta loto ma lagona

O a lava faafitauli o le ola e o'o mai

E affinai i le alofa moni o le Matai

E ui e eseese o ta tupuaga, ae ua taauso i le Fa'aolataga.

Tusia: Faumuina Semau Mulitalo Manu Samuelu

UA AFIO IFO LE AGAGA PAIA

O le finagalo alofa o le Atua

Na ia saunia ai le Faaolataga mo i taua

Na maliu ma toe soifua manumalo Keriso mai le otia ma le

tu'ugamau

Mo le au faatuatua uma ia maua le Ola e faavavau

Ua afio a'e o la i le lagi

Ae auina ifo le Agaga Paia e fai ma fesoasoani

Ua maua ai e i tatou le Pule ma Mana

E soli pala ai I o tatou vae gata ma akarava

O le afio ifo o le Agaga Paia i le Aso Penetekoso
O le o'o mai lea o le mana tatou te manumalo ai le tiapolo

Ua liligi mai lona Agaga i luga ia i tatou uma

Tatou te faia ai wavega e ala i lana fa'au'uga

O le Afio ifo o le Agaga Paia ua tatou maua ai le mana

E suia ai o tatou olaga tuai ma o tatou talavou leaga

Ae avea ma tupulaga fa'amaoni i le humanai

Ia faapaiaina ma ia faa'maoni e avea ma taitai

So'o se mea e fia a aunoa ma le Agaga Paia
O lona taunuuga e faalmaina ma iu i le inosia
E le o le fitafita, e le o le malosi ao le Agaga Paia
Manatua Tavita le talavou na toilalo ai Filisitia

O la Iesu, ia outou talia le Agaga Paia
O lo tatou Taitai tama lea i le manuia

Ae tatau ona tatou salamo ma talia le Mesia
Ona le fano lea o so'o se tasi e faatuatua ia te la

Tusia: Faumuinā Semau Mulitalo Manu Samuelu

E LE GALO OE TINĀ.

Le toelau sa agi i atumauga o le alofa

Na te momolinina lagona fiafia e fatufifatu ai le ola

Agi maia ma pai mai i lo ta tino uma

Sei tau matū ai loimata ona o lau rosa ua le fuga

Savali i le tafa o ata e āśia la'au o le faatoaga

Pagā lea ua le toe nanamu la'u rosa sa puaina i ala

Fesiliglia le galue fanua o le Mata'isau o le Foafoaga

Aumai le tali fa'anoanoa, poia ai ita fa'amana i ofaga

Ua goto nei la le la o le fiafia

Ma ua liua ai mata i le tagi ma lagona mafatia

Le matalasi ma le matagofie o la'au o le foafoaga

Ua magumagu ma avea nei ma laau talatala

Le fetu pupula sa emoemo i le tumutmu mauga

Ua uftitia nei e le ao pogisa ma loifofoga

O lo tatou ola o se fuga e mamae ma toe nou atu

Vaivai ai ou timo ae tau nofo atu ai ma lo ta fatu

O ou faiva alofi līma fa'atina sa e faia ma le filemu

E te ala i le po atoa e taulaga le tamaititi o lo'o tagi masūsi

Afisi atu i lou fatafata ina ia maua se mafanafana

Ma pulatoa atu i nai ona mata e leai se gagana

Le mafanafana o ona loimata ua sisina ifo i lona alafau

O foliga o le tina e alofā moni i lana fanau

Ua malitūina ona aao mafanafana sa ou afu ai

E galo uma ai le mafatia ma lo ta vaihai

Ua faaifo nei la le tuamafa filimalae

Ae tiuu ifo i lalo le lā o lo ta va'a ua masaesae

E aumā tiga o le tino ina ua nuti momomo lo ta agaga
I lata lupe ua le tu tula le tu i lo ta lima, ae ua ifo i le
palapala

Tusia: Faumuinā Semau Multitalo Manu Samuelu

E MAMAE LE TAVA'E IONA FULU

O le tama ma lona aiga o le tagata foi ma lona

fa'asinomaga

E tautala foi ma le poto aua ua malamanalama lelei i lona

tupuaga

E sa'o lana savali, tauagafau ona uiga i luma o tagata

E fa'aloalo ma loto alofa e le va'ava'ai laumata

E fiafia e fa'asoa ma tuifatufa ana mea

Aua e tupu mea avea ae le tupu ni mea e teu pea

O agatausili o mea sina taua ia o le fa'asinomaga o le tagata

O lona aiga, o lana aganuu ma ia maua'a lona fa'attuatugaga

E le tali atu i ni ona lagona ma ni ona manatu

Ae fa'asoa i talitonuga o ona tuaā sa auafa i lona fatu

E pele i lona loto measina o lana aganuu

Aua e mamae le tava'e i ona fulu

O Samoa o le ao mamala i le fa'asaua o ao ma le atu

folasa

O le atunuufoti e le o se atunuufiali ola e manuia foi ona

tagata

E mautu lona fā'avae papa ae afifi i le Atua o le Faaoalataga

Le manulauti lea o le anofale o le atunu

E taofiofi mamau i ai le au fai tofa ina nei mamulu

Ona osoria lea o le vaisulu tafefea lea o pulu.

Ua saoasaoa le falute mai o tu ma aga mai sasa'e

O amioga fa'asalemausau ua salalau solo a le au papa'e

Ao le masau foi latou ia o le fetuleni mai o Saina i Samoa
Ua pei o ni faamanuia i tagata le mananaia o latou

faleoloa

Mulimuli ane ua tatou taufetuli solo e saili ni mea tatou te

nonofo ai

Pe a tatou le fa'acteete ma taofiofi mamau lo tatou tofi, toe
oto ane le pulou a ua tui.

E toe tagi fua la Vi a ua alu le va'a o Eneli

Tahu ai le fa'atamanalama i le aoaoina o le faitau Pi

Tautuana lo ta tofi ma lo ta iganato mai le Atua

Nei valetu'ulima ona maumau lea le sailiga malo a nai

matua

Aua nei se'etia gofie lau vaai ma so'ona momo'o lou loto

Auā e le o mea uma e feilafi ma matagofie, o ni auro.

Samoan tautuana lo ta faasinomaga ina nei manulu

Aua e mamae lava le tavae i ona fulu

Taofiofi mamau peia i le faavae sa saili i le Atua

O le puna lea o manuia ma lo ta ala i malo aua nei tu'ua

Aua e a tatou nei ao lo'o mulimuli mai a tatou fanau

Nei latou ola falōlō i le lumana ona o le leaga o lau

fa'atatau.

Tusia: Faumuinā Semau Multitalo Manu Samuelu